



國朝諸老先生論語精義卷第七上

子路第十三

子路問政子曰先之勞之請益曰無倦

明道曰子路問政孔子既告之矣及請益則曰無倦而已未嘗復有所告姑使之深思也

伊川曰昔周公師保萬民易曰以左右民師保左右先之也勞勉之又勞勉之

橫渠曰為政必身為之倡且不受其勞又益之以不倦

范曰治民者必有以先之而勞之既庶而後富之既富而後教之此其序也先其飢寒而教之以生養先其邪僻而教之以禮義堯之治民也勞之來之正之直之輔之翼之舜曰予欲左右有民禹曰德惟善政皆所以先之也傳曰民生在勤勤則不匱孟子曰民事不可緩也又曰以佚道使民雖勞不怨皆所以勞之也使子路得千乘之國而為之終之以不倦其政亦可以庶幾於此矣

謝曰先之所以率之勞之所以佚之楊曰身以先之勞以勸相之則民悅而不廢事矣然以身先民者常勤始而怠終故請益曰無倦尹曰以身先之而後勞之季路疑其未盡為政之道而請焉故益之以無倦

仲弓為季氏宰問政子曰先有司赦小過舉賢才曰焉知賢才而舉之曰舉爾所知爾所不知人其舍諸

明道曰為政須要有綱紀文章先有司鄉官疑讀法平價謹權量皆不可闕也人各親其親然後能不獨親其親仲弓曰焉知賢才而舉之子曰舉爾所知爾

所不知人其舍諸便見仲弓與聖人用心之大小推此義則一心可以興邦一心可以喪邦只在公私之間耳

伊川曰先有司付與有司也

橫渠曰有司政之紀綱也始為政者未暇論其賢否必先正之求得賢才而後舉之

范曰凡為人上者當用人而不自用用人則逸自用則勞逸則有成勞則無功元首叢脞舜臯陶以為戒故為政之道當先有司小過者人之所不免賢才者

治之所急也不先有司則君行臣職矣不赦小過則下無全人矣不舉賢才則百職廢矣此三者不可為季氏宰况於為天下乎書曰文王罔攸兼于庶言庶獄庶慎先有司也舜臨下以簡御下以寬周公曰無求備於一人赦小過也至於舉賢才未有不由此者也此三者治天下國家之道不止季氏之宰也呂曰有司政之綱始為政者不可遽革乎舊政先正其綱而已不可遽易乎舊人去其太甚而已然後徐舉賢才而任之則事不紛而人不駭治過半矣

謝曰宰有君道當治大不治小籩豆之事則有司存
先有司則所事者大矣小過過也故赦之赦小過則
所刑者故矣疑將以與之成庶務置風聲賢才不可
不舉也賢才不求則已求則爾所不知人將告之矣
焉有為善而不聞者乎

楊曰職業不分則分守不一而政廢矣故先有司有
司各任其責而小過必誅焉則人唯苟免而已無樂
事勸功之志雖有賢才不為用也故赦小過而後賢
才可得而舉此仲弓之問季氏之家政而已推而達

之天下一也

尹曰先有司則可以責成事於下赦小過則不求備
於人舉賢才則賢者進而不肖者退為政之道孰要
於此雖治天下亦可矣豈特為季氏宰而已

子路曰衛君待子而為政子將奚先子曰必也正名乎
子路曰有是哉子之迂也奚其正子曰野哉由也君子
於其所不知蓋闕如也名不正則言不順言不順則事
不成事不成則禮樂不興禮樂不興則刑罰不中刑罰
不中則民無所措手足故君子名之必可言也言之必

可行也君子於其言無所苟而已矣

明道曰名實相須一事苟則其餘皆苟也

伊川曰凡物有形則有名有名則有理如以小為大以高為下則言不順至於民無所措手足也 先生

判西京國子監謂門人曰今日供職只第一件便做它底不得吏人押申轉運司狀某不曾簽國子監自係臺省臺省係朝廷官外司有事合行申狀豈有臺省倒申外司之理只為從前人只計較利害不計較事體直得恁地須看聖人欲正名處見得道名不正

時便至禮樂不興自然住不得夫禮樂豈玉帛之交錯鐘鼓之鏗鏘哉今日第一件便如此人不知一似好做作只這些子某便做它官不得若久做它時須一一與理會

橫渠曰言從作又名正則言易知人易從聖人不患為政難患民難喻

范曰凡有實則有名名不正則實從而亡君不君則非君臣不臣則非臣父不父則非父子不子則非子為君盡君道為臣盡臣道則可以謂之君臣矣為人

盡人道則可謂之人矣名何可以不正事得其序謂之有禮禮得其和謂之有樂事不成則無序亦無和故禮樂不興禮樂不興則暴慢鄙詐之心入之施於政事皆失其道故刑罰不中刑罰者人君所當慎用害及於人之大者也衛國自人倫至於事務名皆不正故夫子先之

謝曰正名不特為衛君而言也為政之道當如此子路不達以為高遠也故孔子以為野有名則有分守故言順而事成者禮樂之實也因實而節文和樂之

則禮樂興民介甫曰禮樂不興則廉恥和睦之風衰而爭狠詐偽之俗成雖有善聽者猶不能無枉也

揚曰名不當其實則言不順言不順則無以考實而事不成事不成則百度廢而禮樂無所錯故不興禮樂不興則無教無教而刑之是罔民也故不中刑罰不中則易犯而難避故無所措手足為政而至於民無所措手足則大亂之道也政之當務孰先於此乎子路學不足而不能闕其所不知孔子以為野尹曰名不正則實將從之君君臣臣父父子子各能

盡其道斯謂之名正名正則分守立故言順而事可成否則事失其序物失其和是以禮樂不興至於刑罰不中民無所措手足衛君自人倫至於事物名皆不正孔子極其本而言之可謂知其要矣子路反以爲迂故曰野哉

樊遲請學稼子曰吾不如老農請學爲圃曰吾不如老圃樊遲出子曰小人哉樊須也上好禮則民莫敢不敬上好義則民莫敢不服上好信則民莫敢不用情夫如是則四方之民襁負其子而至矣焉用稼

范曰孟子曰有大人之事有小人之事又曰或勞心或勞力勞心者治人勞力者治於人治人者食於人治於人者食人君子治其本則不治其末謀其大則不謀其小故禮義信君子所務農圃之事非所當學也

謝曰樊遲問學稼與圃於夫子將以爲民非役志於自殖貨財也若後世許行之學其近之乎以其不知大體也故稱小人如脅弱暴寡之事皆生於不欽服安分以服事其上易使故也用情不愛其情

楊曰樊遲學稼圃蓋欲為神農之言非有利心也豈聞先事後得先難後獲之說誤而為此乎孟子曰有大人之事有小人之事稼圃小民之事也故曰小人哉樊須也此特對大人為言耳故以禮義信發之然樊須遊聖人之門而問稼圃志則陋矣辭而闕之可也待其出而後言其非何也蓋於其問也夫子自謂農圃之不如則拒之者至矣須之學疑不及此而不能問舉一隅不以三隅反故不復及其既出則懼其終弗喻也求老農老圃而學焉則其失遠矣故言之

使知所謂不如老農老圃者意有在也

侯曰為國家者患禮義之不立而民不信也上苟好禮義而民信之矣何患不治哉樊遲問學稼圃其心欲以此為政也故孔子曰吾不如老農老圃以抑之及其出也曰小人哉樊須也君子先立其大者何患小者之不治故曰焉用稼圃樊遲之學則後世與民並耕而食饕餮而治者其近之乎

尹曰孟子曰有大人之事有小人之事又曰養其大體為大人養其小體為小人樊遲舍禮義而不為而

請學農圃故謂之小人

子曰誦詩三百授之以政不達使於四方不能專對雖多亦奚以爲

伊川曰今人不會讀書如誦詩三百授之以政不達使於四方不能專對雖多亦奚以爲須是未讀詩時授以政不達使四方不能專對既讀詩後便達於政能專對四方始是讀詩人而不爲周南召南其猶正牆面而立須未讀周南召南一似面牆到讀了後便不面牆方是有驗大抵讀書只此便是法如讀論語

舊時未讀是這箇人及讀了後又只是這箇人便是不曾讀也又曰窮經將以致用也世之號爲知經者果能達于政事專對乎所謂窮經者章句之末耳此學者之大患也

范曰學詩者爲其可以施之政事言語也授之以政不達者不能行之也使於四方不能專對者不能言之也既不能行之又不能言之雖多聞不足貴也謝曰誦詩而不自得不足以致用不足以致用則徒能誦之亦奚異書肆故曰雖多亦奚以爲如學禮者

失其義而陳其數也窮理故授之以政而達可以言
故使於四方能專對

楊曰知王政之所由廢興則授之以政必達矣得其
所以言則斯能專對矣不如是皆口耳誦數之學也
雖多亦奚以為

侯曰詩可以興可以觀可以羣可以怨四者學詩者
苟能知之授之以政豈有不達哉使於四方豈有不
能專對若或不能則誦其章句而已豈學詩者之用
心哉故曰雖多亦奚以為

尹曰季札聞詩而知國政則詩者政之所繫也不學
詩無以言則學詩者有志乎言也授之以政不能通
達又不能善其言然則誦之雖多亦何以為大抵為
學貴乎有用而已

子曰其身正不令而行其身不正雖令不從

范曰記曰下之事上也不從其所令從其所行楊雄
曰政之本在身身立則政立矣為政之道正身而已
其身不正未有能正人者也

謝曰人信則易從故不令而行已不能行則人且不

信如之何其使之從己也
楊曰正己而物正矣故不待令而從其身不正雖強
之使從終必違而已矣
侯曰正己而物正者也
尹曰子帥以正孰敢不正是也
子曰魯衛之政兄弟也

伊川曰言兄弟者以其相似也

范曰孔子世家曰子適衛見出公曰魯衛之政兄弟
也二國本兄弟之親及其衰也政亦相類故譏之也

呂曰魯衛兄弟之國也當時二國之政猶存兄弟之
道

謝曰魯衛之土地人民政事其齊醜則兄弟
楊曰兄弟猶所謂年兄弟也貌兄弟也言魯衛之政
無大相過而已

侯曰魯衛之土地人民政事無甚相遠故曰兄弟也
尹曰言其政之相若也

子謂衛公子荆善居室始有曰苟合矣少有曰苟完矣
富有曰苟美矣

范曰富人之所以欲也其患在於貪求無厭犯禮悖義以入於亂公子荆其欲易足不求多餘內重而外物輕非誠心為善者不能如是足以為法矣人君富有天下其欲易足則其求易給約其一身以裕萬民其德豈不厚哉

謝曰非君子之宅心則亦苟而已

楊曰務為完美則累物而驕吝之心生公子荆皆苟而已故夫子善之

侯曰公子荆之居室也不役志於物故孔子善之

尹曰衛公子荆君子也不以外物為心其欲易足故曰苟而已所以善之也

子適衛冉有僕子曰庶矣哉冉有曰既庶矣又何加焉曰富之曰既富矣又何加焉曰教之

范曰此治民之序自堯舜以來未有不由之者也禹平水土以居民所以庶之也稷播百穀所以富之也契敷五教所以教之也衛之人民既庶矣而無以治之故曰庶矣哉冉有善問故告之以其序求之為政則未及此也然是言也冉有亦能行而聖人之治亦

未有以易此也

謝曰庶而不富則救死而恐不贍奚暇治禮義哉富而不教則近於禽獸

楊曰既庶矣當使之養生送死無憾然後可驅而之善此不易之道也

侯曰既庶既富矣逸居而無教則近於禽獸

尹曰衣食足而後知榮辱故富而後教之富而不教則近於禽獸矣

子曰苟有用我者朞月而已可也三年有成

伊川曰仲尼三年有成因周之舊

無難焉

或問為政遲速曰仲尼嘗言之矣苟有用我者期月

而已可也三年有成者蓋欲立致治之

功業如堯舜之時夫是之謂有成此聖人之事它人

不可及某嘗言後世之論治者皆不中道理漢公孫

丞相言三年而化臣弘尚竊遲之唐李石謂十年責

治太蚤皆率爾之言聖人之言自有次序所謂朞月

而已可也綱紀布也三年有成治功成也聖人之事

後世雖不敢望如此然二帝之治惟聖人能之三王

以下事業大賢可爲也。又曰昔在經筵時嘗說及此因言陛下若以期月之事問臣臣便以期月之事對若以三年之事問臣臣便以三年之事對期月而已者整頓大綱也若夫有成則在三年也然期月三年之說今世又不同須從頭整理可也漢公孫弘言三年而化臣竊遲之李石對唐文宗以謂陛下責治太急皆率爾之言本不知期月三年之事

范曰夫子視天下之亂而道不得行未有能用之期月者也堯舜之道三王之政舉而措之天下無難故以計成功之時也

期月而已可也雖聖人亦必三年乃有成功三年天道之成也故唐虞三載考績周禮三年則大比皆可以計成功之時也

謝曰必欲拔本塞源略法先王謂之成近效則歲月亦可

楊曰聖人損益三代之成憲措之天下蓋若數一二矣夫豈患其難哉期月而已可三年有成宜未占而孚其施設之序固已前定

尹曰孔子歎當時莫能用已也曰誠有用我者期月

可以行其政教三年可以成功也

子曰善人爲邦百年亦可以勝殘去殺矣誠哉是言也
伊川曰勝殘去殺只是能使人不爲惡善人者不踐
迹亦不入於室之人也不踐已前爲惡之迹然亦未
入道也

范曰善人不踐迹亦不入於室故爲邦百年馴致治
平亦可以勝殘去殺矣若聖人爲天下則不待百年
矣

謝曰好德而無枝害之心則可以省刑罰

楊曰善人則無惡矣其爲邦必有可繼之道故積百
年之久亦足以勝殘去殺

尹曰勝殘去殺人不爲惡已善人之功如是若夫聖
人爲天下則不待於百年其化民亦不止於不爲惡
而已

子曰如有王者必世而後仁

伊川曰三十曰壯有室之時父子相繼爲一世王者
之效則速矣又曰三十年爲一世三十壯有室也
必世而後仁化浹也或問孔子曰用我者三年有

成言王者則曰必世而後仁何也曰所謂仁者謂風移俗易民歸於仁天下變化之時此非積久何以能致其曰必世理之然也有成者謂法度紀綱有成而化行也如欲民仁非必世安可

范曰如有王者必世而後仁君子創業垂統為可繼也故必世而後仁道成然而湯有天下身致太平豈必世乎禹之功在堯舜之時而湯之仁亦著於夏桀之世天下歸之久矣是亦世也至於周則成康之時仁道乃成後之王者漢至於文帝唐至於太宗亦必

世之効也

謝曰為當時言於斯時也有王者作亦必世而後仁仁如成周行葦之時

楊日期月而可三年有成宜若易然矣當是時欲仁如行葦之詩雖有王者作亦必世而後可也蓋自文武至於成王之時為然豈一日之積乎

尹曰甚矣仁政之大也父子相繼為一世先儒亦以三十年為世雖王者必世而後仁政乃成禹之功建於堯舜之時湯之仁著於夏桀之世周至於成康仁

政乃成也

子曰苟正其身矣於從政乎何有不能正其身如正人何

范曰先正其身而以德行仁王者之事也不能正其身而以力假仁霸者之事也後世之治所以不及三王者無他焉不本諸身而正其在外者也

謝曰其身正不令而行

楊曰有規矩而後方圓不欺未有無規矩而能正其方圓者也

侯曰身者人之標準也苟能正其身矣於從政乎何有

尹曰楊雄曰政之本身也身立則政立矣大學曰身修而后家齊家齊而后國治

冉子退朝子曰何晏也對曰有政子曰其事也如有政雖不吾以吾其與聞之

伊川曰冉子謂季氏之所行為政孔子抑之曰其事也言季氏之家事而已謂之政者僭也如國有政吾雖不用猶當與聞之也又曰冉有謂季氏所行為

政僭也如國有政吾雖不用猶當與聞或問政與事何異曰閔子騫不肖為大夫曾皙不肖為陪臣皆知此道季路冉求未能然夫政出於君冉求為季氏家臣家事安得謂政是時季氏專政孔子因以明之曰季路冉有稍明聖人之道何不知此曰是時陪臣執國命見聞習俗為常皆不知有君此言何足怪范曰冉有仕於季氏之朝以季氏之家事為政故曰有政夫子正之曰其家事而已如有政夫子必聞之令不出於君是以知非政也此所以正君臣明冉有

之非也

呂曰大夫雖不治事猶得與聞國政

謝曰如冉子學於聖人者猶且言事而不及政則當時為國者可知矣

楊曰夫子之至是邦必聞其政故曰如有政雖不吾以吾其與聞之冉子以事為政名實紊矣故夫子正之

尹曰政者教也化也事事也冉子以事為政故孔子辨之

定公問一言而可以興邦有諸孔子對曰言不可以若是其幾也人之言曰爲君難爲臣不易如知爲君之難也不幾乎一言而興邦乎曰一言而喪邦有諸孔子對曰言不可以若是其幾也人之言曰予無樂乎爲君唯其言而莫予違也如其善而莫之違也不亦善乎如不善而莫之違也不幾乎一言而喪邦乎

伊川曰一言可以興邦公也一言可以喪邦私也

范曰書曰后克艱厥后臣克艱厥臣此舜禹所以相戒也人君之患在於自滿人臣之患在於求容知爲

君之難則能聽言矣知爲臣之難則能納忠矣古之興邦者未有不由此也言而莫予違則忠言不至於耳君驕逸於上臣悅佞於下古之喪邦者未有不由此也

謝曰知爲君之難則必敬慎以持之唯其言而莫予違則讒諂面諛之人至矣邦未必遽興喪也而興喪之源分於此然此非識微之君子何足以知之楊曰知爲君之難必思所以圖其易欲言而莫予違則法家拂士遠而讒諂面諛之人至邦之興喪不其

幾乎臯陶之告其君曰后克艱厥后臣克艱厥臣政
乃又舜之戒其臣曰予違汝弼汝無面從亦為是而
已

尹曰知為君之難則必知欽慎持守之道唯其言而
莫予違也則讒諂面諛之人至矣邦之興喪未有不
由此二者於一言而興喪存焉故曰幾

葉公問政子曰近者說遠者來

范曰欲遠者來必自近始欲近者說必自親始書曰
立愛惟親立敬惟長始於家邦終於四海孟子曰親

親而仁民仁民而愛物此遠近之序也葉公之治止
於一縣諸侯治一國天子治天下其為政一也詩曰
惠此中國以綏四方近說遠來之道也

謝曰被其澤則說聞其風則來

楊曰近說遠來邇可遠在茲之意

侯曰為政而能使近者說則遠者來矣

尹曰近者說之遠者來之是謂善政

子夏為莒父宰問政子曰無欲速無見小利欲速則不
達見小利則大事不成

明道曰子張問政子曰居之無倦行之以忠子夏問政子曰無欲速無見小利子張常過高而未仁子夏之病常在近小故孔子各以切己之事答之

范曰子夏之學患在於不及欲速則求易成見小利則圖近功聖人久於其道故不欲速成致天下之大利故不見小利乾之象曰君子以自強不息升之象曰君子以順德積小以高大進德修業未嘗有止亦不可一日而成也如日月東西相從而不已則無不達矣見小利以為足終不可以入堯舜之道如天地

之利萬物無有不利大事豈有不成者哉

謝曰與四時俱者無近功祈功於朝暮者必不能歲計之而有餘見小利則必無見大之理

楊曰欲速則必至於行險見利則必至於違義

尹曰子夏之病常在近者小者故以是答之也

葉公語孔子曰吾黨有直躬者其父攘羊而子證之孔子曰吾黨之直者異於是父為子隱子為父隱直在其中矣

范曰父為子隱則慈子為父隱則孝父慈子孝天下

之直也夫隱有似乎不直至於父子天性則以隱為直也爭有似乎不順至於君父有過則臣子以爭為順也隱與直反然而父子必隱乃為直爭與順反然而臣子必以爭為順直躬以直為信而不知父子之道猶妾婦以順為正而不知君臣之義也

呂曰屈小信而申大恩乃所以為宜

謝曰順理為直父不為子隱子不為父隱於理順邪瞽瞍殺人舜竊負而逃遵海濱而處當是時愛親之心勝其於直不直何暇計哉

楊曰父子相隱人之情也若其情則直在其中矣子證其父豈人情也哉逆而為之曲孰甚焉又曰父子之真情豈欲相暴其惡哉行其真情乃所謂直反情以為直則失其所以直矣乞醯之不得為直亦猶是也

侯曰父子相隱直也豈有反天理而為直哉故孔子曰父為子隱子為父隱直在其中矣

尹曰順理為直父為子隱子為父隱所以直在其中

矣

樊遲問仁子曰居處恭執事敬與人忠雖之夷狄不可
棄也

明道曰居處恭執事敬與人忠此是徹上徹下語聖
人元無二語 又曰居處恭執事敬與人忠充此便
瞬面盎背有諸中必形諸外觀其氣象便見得 又
曰執事須是敬然不可矜持太過

伊川曰君子之遇事無巨細一於敬而已簡細故以
自崇非敬也飾私知以為竒非敬也要之無敢慢而
已樊遲問仁子曰居處恭執事敬與人忠雖之夷狄

不可棄也然則執事敬者固為仁之端也推是心而
誠之則篤恭而天下平矣

范曰君子戒慎乎其所不睹恐懼乎其所不聞故居
處不可不恭坐如尸立如齋此居處之容也夫子居
不容者不為容止而已非惰也出門如見大賓使民
如承大祭執事無不敬也曾子曰吾日三省吾身此
與人無不忠也君子之道無有內外况夷狄乎正心
誠意所以為道夷狄之國雖無禮義而道不可須臾
離也

謝曰居處恭執事敬與出門如見大父使民如承大祭之意同方是時如屏氣似不息者與人忠有惻隱之意此三者性與之俱立身與之俱動豈為夷狄而棄之哉非不可棄也不能棄也

楊曰居處之恭執事之敬與人之忠為己而已非有因乎人也安土敦乎仁則豈以夷狄之殊而更其所操

尹曰居處恭執事敬與人忠固皆為仁之方君子不可以須臾離者也豈以夷狄而棄之乎

子貢問曰何如斯可謂之士矣子曰行己有恥使於四方不辱君命可謂士矣曰敢問其次曰宗族稱孝焉鄉黨稱弟焉曰敢問其次曰言必信行必果硜硜然小人哉抑亦可以為次矣曰今之從政者何如子曰噫斗筭之人何足算也

明道曰言不必信行不必果唯義所在大人之事言必信行必果硜硜然小人之事小人對大人為小非為惡之小人也故亦可以為士

伊川解曰子貢之意欲為皎皎之行聞於人者而夫

子所告乃篤實自得之事子貢未喻而復問其次故
答以言必信行必果硜硜然小人哉抑亦可以為次
矣子貢方悟而推之曰然則今之從政者何如子曰
志求斗筭之人何足算也志苟急於斗筭唯恐不能
暴見也非盡謂今之從政為斗筭之人也

呂曰行已有恥者有知也使不辱命者有能也有知
有能足以為士其次有行其次有節

謝曰行已有恥則必不為可賤之事使於四方不辱
君命則其材可以任事能不為而能為者也宗族稱

孝鄉黨稱弟亦可謂行修矣言必信行必果雖未若
大人惟義所在然亦不害其為自守

楊曰行已有恥使於四方不辱君命一國之善士也
宗族稱孝焉鄉黨稱弟焉一鄉之善士也故居其次
言必信行必果則一介之士而已斯為下謂之小人
者對大人為言也孟子曰大人者言不必信行不必
果惟義所在蓋申此義以發之

尹曰子貢之問皆欲皎皎之行聞於人者夫子告之
皆篤實自得之事

子曰不得中行而與之必也狂狷乎狂者進取狷者有所不爲也

謝曰狂者有躡等進取之心所見常過所得如曾皙是也狷者過於不爲不善若不受謝於嗟來其狷者之所爲乎

楊曰狂者過之狷者不及皆不知所以裁之者與而裁之則於中行其幾矣

侯曰子曰不得中行而與之必也狂狷乎如曾點之狂夫子喟然曰吾與點也則其狂可使俯而就之矣

子謂子夏曰女爲君子儒無爲小人儒則不及者尚可勉而至之也如自棄自暴者雖不爲狂狷尚可得而進退乎

尹曰中行得行中道者也

子曰南人有言曰人而無恆不可以作巫醫善夫不恆其德或承之羞子曰不占而已矣

伊川曰有吉凶便占無恆之人更不待占又曰子曰不得中行而與之必也狂狷乎狂者進取狷者有所不爲也子曰南人有言曰人而無恆不可以作巫

醫善夫不恒其德或承之羞子曰不占而已矣當通
為一段其間雖有子曰字然文勢隔不斷論語若此
者多中行固然然狂狷亦是有常若無常則不可測
度鄉愿是其一故曰不占而已矣

謝曰巫醫正賴誠意於禍福死生之際占所以考禍
福死生也觀誠不誠則不占而可知

楊曰人無常心無不為己巫醫慎疾者所賴尤不可
為也易曰不恒其德或承之羞夫君子之於易也居
則觀其象而玩其辭動則觀其變而玩其占苟玩其

占則不恒其德知其或承之羞必矣其為不恒也蓋
亦不占而已矣

侯曰易曰振恒凶則是無恒者雖巫醫不可為也不
恒其德或承之羞蓋謂羞辱承之可不占而知也
尹曰善夫南人之言也易曰不恒其德或承之羞言
德行無恒則或為羞辱承之不恒之人占決亦無所
據也

子曰君子和而不同小人同而不和
呂曰和則可否相濟同則隨彼可否調羹者五味相

合為和以水濟水為同

謝曰君子出處語默安可同也然不害其為和小人
事同而理不和

楊曰五味調之而後和而五味非同也如以鹹濟鹹
則同而已非所以為和也君子有可否以相濟故其
發必中節猶之五味相得也小人以同為說猶之以
鹹濟鹹耳尚何和之有

侯曰和非同也和則雖有不可之異濟其美而已
故曰君子和而不同同非和也同惡相濟如以水濟

水安能和哉故曰小人同而不和

尹曰君子尚義故有不同小人尚利安得而和

子貢問曰鄉人皆好之何如子曰未可也鄉人皆惡之
何如子曰未可也不如鄉人之善者好之其不善者惡
之

范曰子貢所問取人之法也未有善人而不善人亦
好之未有不善人而善人亦好之也皆好之未可也
為其近於鄉愿也皆惡之未可也為其近於獨立也
一鄉之人必有善人焉有不善人焉好善則善者好

之惡不善則不善者惡之欲知人之善惡者審其所
好惡者而已矣善人好之不善人惡之其善善惡惡
豈不明哉人君以此察臣下則忠邪可知也
謝曰鄉人不容皆君子故皆好之未可也鄉人不容
皆小人故皆惡之未可也善不善各從其類故善者
好之知其可也以善人好善人其不善者惡之知其
可也以不善人惡善人若鄉人皆善人也則皆好之
何害鄉人皆不善人也則皆惡之何害

揚曰此與孟子論見賢見可殺而後用之殺之同意
尹曰善者好之不善者惡之則其人之善惡可知矣
子曰君子易事而難說也說之不以道不說也及其使
人也器之小人難事而易說也說之雖不以道說也及
其使人也求備焉

范曰揚曰天下有三好衆人好已從賢人好已正聖
人好已師君子喜人正已故不可悅以非道小人喜
人從已故可悅以非道君子之性雖不可以妄悅矣
然而堯畏巧言令色舜難任人夫子遠佞人不畏不
難不遠則恐其悅而不自知也使人也器之堯舜之

事也稷播百穀契敷五教伯夷典禮后夔典樂禹稷
之賢皆專治一事則才之小者可知也伊尹稱湯與
人不求備聖人重於責人此所以易事也
謝曰君子以道為量無意於人之說已故說之不以
道不說也才全德備每有矜不能之意故使人也器
之小人自待輕故說之雖不以道說也嘗有與人爭
能之意故使人也求備焉

楊曰君子樂取諸人以為善其使人也器之故易事
遜志之言必求諸非道故難說小人以同己為是而

忌人之勝己故說之不必其道而說而使人也求備

子焉
侯曰君子小人之不同如此

尹曰君子無意於人說已也故說之不以道則不說
小人唯欲人之順己故說之雖不以道說也君子使
人器之不求備於人也故易事小人反是
子曰君子泰而不驕小人驕而不泰

范曰君子為善故常泰為善日不足故不驕小人易
滿故常驕易滿必多憂故不泰君子與小人未嘗不

相反也

謝曰泰則宜其驕而卒歸於不驕驕則宜其泰而卒歸於不泰君子在我者也皆古之制也所以安不侮鰥寡所以不驕小人懷慢人之心故驕畏人故不泰楊曰心廣體胖故不驕虛驕而盛氣故不泰侯曰泰則不驕驕則不泰尹曰泰則不驕驕則不泰理固然也

子曰剛毅木訥近仁

伊川曰人之私其己也由私其己故枉道拂理諂曲

邪佞無所不至彼剛強果毅木質訥鈍者則不能為故少近於仁也語錄曰剛者強而不屈毅者有所

發木者質朴訥者遲鈍四者質之近乎仁者也又

曰剛毅木訥何求而曰近仁只為輕浮巧利於仁甚

遠故以此為近仁此正與巧言令色相反又曰剛

者堅之體發而有勇曰毅木者質朴訥者遲鈍此四

者比之巧言令色則近於仁亦猶不得中行而與狂

狷也

范曰剛者無欲無欲則無利心毅者致果致果則勇

於為善木則無巧偽訥則無辨給此四者皆近仁之道也未有柔而能仁未有怯而能仁未有巧而能仁未有辨而能仁者也

謝曰要之四事皆心不縱恣者能之故近於有所知覺

楊曰剛毅則不屈於物欲木訥則不至於外馳故近仁

尹曰巧言令色鮮矣仁故剛強果毅木質訥鈍者為近焉

子路問曰何如斯可謂之士矣子曰切切悌悌怡怡如也可謂士矣朋友切切悌悌兄弟怡怡

子明道曰切切如體之相磨悌悌則以意此言告子路故曰切切悌悌怡怡如也

范曰切切者責以善也悌悌者進於德也兄弟主於愛故曰怡怡子路剛勇所不足者中和也故告之以此

謝曰內善於兄弟外信於朋友非不修身者能之也楊曰朋友之交親而後有切悌之義兄弟無責善怡

怡而已皆救子路之行行
侯曰切切惇惇朋友之道也怡怡和樂兄弟之義也
知之者可以為士矣惇惇切磋之義
尹曰切切責以善也惇惇進於德也朋友之道當然
若兄弟則主於和順故曰怡怡子路剛勇所不足者
中和故告之以此

子曰善人教民七年亦可以即戎矣

伊川曰善人教民七年亦可以即戎聖人度其時可
矣如大國五年小國七年云 又曰教民戰至七年

則可以即戎也凡看文字如七年一世百年之事皆
當思其作為如何乃有益

楊曰善人教民七年之久則民信而服從雖即戎可
也

子曰以不教民戰是謂棄之
范曰晉文公始入二年教其民將用之子犯曰民未
知義未安其居又曰民未知禮未生其共又曰民未
知信未宣其用文公霸者之事猶如此而况於王者
乎以不教民戰戰而勝者以民徼倖也非上之功也

戰而不勝者上之罪也

謝曰教之使民親其上死其長如子弟之衛父兄如手足之捍心腹以此戰也其克必矣反此則棄之之道也

楊曰申令不明失伍離次則敗亡也必矣非棄之而何

侯曰教民教其孝悌忠信爾非特戰陣也然戰陣在其中矣

尹曰戰危事也民不教而使之是棄之也孟子曰不教民而用之謂之殃民與此義同

國朝諸老先生論語精義卷第七下

憲問第十四

憲問恥子曰邦有道穀邦無道穀恥也

范曰君子之仕所以行其義非利其祿也邦有道則諫行言聽膏澤下於民富其祿者榮也邦無道則諫不行言不聽則膏澤不下於民富其祿者恥也原憲不受非義之祿能事斯語故以告之

謝曰邦無道非君子志行之時而得穀其為小人也可知矣故恥

揚曰當儉德避難之時而榮以祿非枉道從之其可得乎是足恥也

尹曰邦無道而祿未免枉其道是可恥也原憲甘貧守道可以語此

克伐怨欲不行焉可以為仁矣子曰可以為難矣仁則吾不知也

伊川解曰人而無克伐怨欲為仁者能之有而能制其情不行焉亦難能也謂之仁則未可也此原憲之問夫子奮以知其為難而不知其為仁也此聖人開

示之深也 又語錄曰原憲孔子高弟問有所未盡

蓋克伐怨欲四者無然後可以為仁有而不行未至於無故止告之以為難 又曰人無克伐怨欲四者

便是仁也只為原憲著一箇不行不免有此心但不行耳子曰可以為難矣此孔子著意告原憲處欲它有所啓發他承當不得不能再發問也孔門如子貢者便能曉得聖人意耳如曰女以予為多學而識之者與對曰然便復問曰非與孔子告之曰非也予一以貫之原憲則不能也 又曰克伐怨欲不行焉可

以為仁矣若無克伐怨欲固為仁已唯顏子而上乃能之如有而不行焉則亦可以為難而未足以為仁也孔子蓋欲憲疑而再問之而憲未之能問也范曰克者好勝也伐者自矜也怨則多伎欲則多求此四者不行可謂難矣此易之者實多故也仁之於道不止於四者

呂曰克伐怨欲之不行可以去不仁而未可以為仁謝曰克伐怨欲不行未必不出於仁然未足以見仁之本體其曰吾不知非直以為不仁也

楊曰克伐怨欲常人之情易發而難制有而不行可以為難矣若夫仁則又奚克伐怨欲之有哉尹曰克伐怨欲咸無焉斯可謂之仁矣徒能不行焉是有而制之也以為難能則可矣此聖人開示之切惜乎原憲不能再問也

子曰士而懷居不足以為士矣

橫渠曰安土不懷居也有為而重遷無為而輕遷皆懷居也

范曰士志於道故食不求飽居不求安恥惡衣惡食

與懷居者皆不足以為士也夫士猶不可以懷居况居天下之廣居者乎堯不以位為樂而以天下為憂禹卑宮室天子之不懷居也

謝曰懷居與恥惡衣惡食同決不可以適道矣

楊曰懷居則不能徙義安足為士

尹曰士志於道何懷居之有哉

子曰邦有道危言危行邦無道危行言孫

明道曰邦有道穀邦無道穀恥也此泛舉也直哉史

魚不若君子哉蘧伯玉然則危言危行危行言孫乃

孔子之事也危猶獨也與眾異不安之謂邦無道行雖危而言不可不孫也

伊川曰直哉史魚不若君子哉蘧伯玉卷而懷之乃

危行言孫也危行者嚴厲其行而不苟言則當孫

范曰行不可以少貶也言則有時而危有時而遜焉

知國之治亂觀其士之言行而已使士而言遜其國

豈不殆哉

謝曰危行以身徇道也殺身而無補君子不貴故言當遜以出之

楊曰危行以潔身孫言以遠害

侯曰邦有道則諫行言聽以身徇道也故危言危行
邦無道諫不行言不聽獨善其身可也故危行言孫
遠禍而已

尹曰君子之持身不可變也至於言則有時而不敢
盡以避禍也為國者使士言遜不亦殆哉
子曰有德者必有言有言者不必有德仁者必有勇勇
者不必有仁

伊川曰和順積於中而英華發於外也故言則成文

動則成章

范曰德者本也言者枝葉也未有本固而枝葉不茂
者也仁之為力天下莫之能勝也故勇生焉仁譬則
心也勇譬則四體也未有心壯而四體不能者也夫
勇而有義乃可以不為亂豈必能兼仁哉

呂曰有德者然後知德故能言尚辭者德有所不察
仁者推愛不勇則不至尚勇者愛有所不行
謝曰本深而未茂器大而聲闕有德者所以必有言
也七八月之間溝澮可立待其涸此有言者所以不

必有德也仁者愛人惡人之害之故必有勇勇者有時無義疾貧故不必有仁

楊曰有得於中則其發於外也必中故必有言有言者行或不掩焉故不必有德仁者由義而行故必有勇勇者能不懼而已故不必有仁

侯曰有德者必有言有德之言如聖賢之言是也有言者不必有德狂者過之如琴張曾皙之言是也仁者必有勇文王武王一怒而安天下之民是也勇者不必有仁如撫劍疾視曰彼惡敢當我哉匹夫之勇是也

尹曰有德者必有言徒能言者未必有德也安乎仁者志必勇徒能勇者未必有仁也

南宮适問於孔子曰羿善射奭盪舟俱不得其死然禹稷躬稼而有天下夫子不答南宮适出子曰君子哉若人尚德哉若人

明道曰南宮适以禹稷比孔子故孔子不答范曰南宮适賤力而貴德知德之可尚則勉進於德矣禹稷有天下故夫子不敢答弗敢當也既出而稱

之者志其言之善也

謝曰南宮适知以躬行為事是以謂之君子知言之要非尚德者不能在當時發問問必有目擊而道存首肯之意非直不答也

揚曰禹稷之有天下不止於躬稼而已孔子未盡然其言故不答然而不止之者不責備於其言以沮其尚德之志也故曰君子哉若人尚德哉若人蓋與其尚德而已與所謂雍之言然夫人不言言必有中之類則異矣

尹曰南宮适以躬行為事不貴乎力取尚德之君子也夫子之不答者以其曰有天下不敢當也

子曰君子而不仁者有矣夫未有小人而仁者也

范曰中心安仁者天下一人而已矣君子之行未必皆能仁也故有時而不仁至於小人則與君子反故未有仁者也夫用君子猶有不仁况小人豈有仁哉呂曰君子志於公天下德心稍懈則流入於私小人志於私一己則不得盡其公謝曰與易所謂小人不恥不仁之意立語不同毫忽

之間心不在焉不仁也然未害為君子
楊曰顏淵三月不違仁而已則君子而不仁蓋有矣
夫
侯曰君子與天地少不相似則不仁矣小人未始進
君子之心何取於仁哉
尹曰盡人道者聖人之事君子行仁或未能盡之則
子有矣至於小人豈復有仁哉甚言小人之不仁也
子曰愛之能勿勞乎忠焉能勿誨乎
范曰愛人者閔其勤勞故勞之忠於人者欲其為善

故誨之此二者出於人心而非自外之至也仁君推
此以及天下其可謂民之父母矣愛之則母之親者
也忠之則父之教者也

謝曰愛則不倦忠則盡誠

楊曰愛之不以姑息則不能勿勞忠焉必善道之則
不能勿誨

侯曰愛之則唯恐其不至安能勿勞忠焉則唯恐其
不聽安能勿誨

尹曰愛其人而欲成之必勉之以事業忠其人而欲

曉之必反覆其辭說

子曰爲命禪謚草創之世叔討論之行人子羽修飾之東里子產潤色之

范曰鄭小國也其爲命令必更此四賢然後成故鮮有敗事此可以爲法矣以天下之大命令不可不慎賢人不可不衆多其若無人則是小國之不如也

謝曰當春秋時諸侯之使辭令之善足以解忿紓難息暴國之患况鄭小國也謀之可不慎乎

楊曰討論潤色以衆賢爲之故其交鄰好論民志無失辭焉古之辭命皆足爲後世法亦其討論潤色之詳也

侯曰鄭小國也其辭命若可觀者能者草創之明者討論之文者修飾之智者潤色之其周如是故可觀也

尹曰命政令也當春秋時鄭以區區小國而能自立大國之間者得人而善用之故也况有天下者乎或問子產子曰惠人也問子西曰彼哉彼哉問管仲曰人也奪伯氏駢邑三百飯蔬食沒齒無怨言

范曰子產有君子之道四惠其一也語其德行惠為
多焉故曰惠人則其不足者可知矣子西無所取故
曰彼哉彼哉子產養民者也未及為政管仲為政者
也未及知禮為政不主於惠而主於義予奪如此則
惠大矣奪之而人不怨者心無私也無私然後人道
盡故曰人也

謝曰猶衆人之毋斯惠人也然不害其為愛人子西
之事無足道故曰彼哉彼哉奪伯氏駢邑三百飯疏
食沒齒無怨言非怒以過奪故人服當世時天下駢

亂甚矣

疑

微管仲幾不足以克之故夫子取之也

楊曰子產有君子之道四焉曰惠人而已者舉其盛
也彼哉彼哉者蓋外之者也管氏奪伯氏駢邑三百
飯疏食沒齒無怨言奪之以義而當理故也人無是
非羞惡之心非人也有而當其實斯為人矣
侯曰管仲以人道治人故人誠服而無怨後世如武
侯之於李平廖立也近之

尹曰子產卒仲尼聞之出涕曰古之遺愛也彼哉彼
哉無所取也誅有罪而被誅者不怨其政可知也

子曰貧而無怨難富而無驕易

伊川曰貧不怨則諂諂尤甚於怨蓋守不固而有所為也

范曰此為伯氏而言也唯君子能安於貧自非君子其不怨者鮮矣處富易處貧難天下之情一也

謝曰貧如與仁同過者無怨所以為難富如與仁同功者無驕所以為易

楊曰富而無驕自好者能之貧而無怨非安於義分不能也

侯曰怨甚於諂非學者不能無故貧而無怨難富者怨之府稍自愛者不敢以富驕人故富而無驕易尹曰處富易處貧難人之情也

子曰孟公綽為趙魏老則優不可以為滕薛大夫

明道曰孔子言公綽之不欲則其仁可知矣優為趙魏老而不可為滕薛大夫滕薛小國政繁事紊綱紀不立法度不明而趙魏綱目舉故也

范曰人才各有所宜公綽不欲故優於趙魏而不宜滕薛君子使人也器之則天下無廢才矣

謝曰老有德之稱大夫以才治事者
楊曰知之弗豫枉其材而用之則為棄人矣此君子
所以患不知人也言此則孔子之用人可知矣
尹曰老者有德之稱大夫以才治事之任公綽不欲
故優於趙魏而不可於滕薛善為國者使人各欲當
其才而已矣

子路問成人子曰若臧武仲之知公綽之不欲卞莊子
之勇冉求之藝文之以禮樂亦可以為成人矣曰今之
成人者何必然見利思義見危授命久要不忘平生之

言亦可以為成人矣

明道曰兼此數人之所長而文之以禮樂亦可以為
成人矣言成人之難也武仲之知非正也若文之以
禮樂則無不正矣今之成人者見利思義見危授命
謂忠也久要不忘平生之言謂信也有忠信而不及
於禮樂亦可以為成人又其次者也

伊川曰知之明信之篤行之果知仁勇若孔子以謂
成人不出此三者武仲智也公綽仁也卞莊子勇也
又曰須是合此四人之能文之以禮樂亦可以為

成人矣然而論其大成則不止於此若今之成人則又其次也又曰語今之成人者只是語忠信也忠信者實也禮樂者文也語成人之名自非聖人孰能之孟子曰唯聖人然後可以踐形如此方可以稱成人之名又曰合此四人之偏文之以禮樂方成聖人則盡之矣

范曰好知不好學其蔽也蕩臧武仲知而已好勇不好學其蔽也亂卞莊子勇而已其餘不足稱也公綽能自克於不欲而未能無欲無欲則能剛如公綽者

寡欲而已如冉求者多才而已皆未足為學也故不得為成人兼四子之能而文之以禮樂此古之成人也禮所以立樂所以成學至後可以為成人矣若今之成人者臨財無苟得臨難無苟免與朋友交言而有信有此三者雖不至於古亦可以為成人矣此子路所能也言古之成人所以勉子路進於禮樂也

謝曰成人雖未至於聖人然不可以一事名矣蓋其具人道者也未可謂之聖人特尚可以體質論故也

若武仲之智公綽之不欲卞莊子之勇冉求之藝而
又潤色之以禮樂則於酬酢應變蓋有餘地矣今之
成人見利思義則不為利回見危授命則不為威惕
亦豈苟然者

楊曰得其一體不可為成人成人其具體者也故有
四子之才而文之以禮樂則亦可為成人而已尚非
其至也今之成人何必然則所與又下矣見利思義
則不欲者斯能之見危授命則勇者斯能之久要不
忘平生之言則忠信者斯能之雖未能文之以禮樂

亦可以為成人矣蓋世道衰微而責人以備則人將
自絕於成人之列非所以與人為善也與文王之為
文敏而好學不恥下問亦謂之文同意或問不欲
者成人之質也人而有欲雖知如武仲勇如卞莊藝
如冉求亦不足為成人而仲尼之言不欲必先之以
知何也曰雖有其質不先於致知則無自而入德矣
尹曰孟子曰唯聖人然後可以踐形能盡夫成人者
也臧武仲知之明孟公綽守之篤卞莊子行之勇冉
求藝之多兼此四人之長而文之以禮樂則亦可以

為成人矣臨利無苟得臨難無苟免言而有信義此三者又可以為其次矣

子問公叔文子於公明賈曰信乎夫子不言不笑不取乎公明賈對曰以告者過也夫子時然後言人不厭其言樂然後笑人不厭其笑義然後取人不厭其取子曰其然豈其然乎

范曰喜怒哀樂發而後中節謂之和和者天下之達道也公明賈之言無不中理此君子之成法也公叔文子未必皆能知之故曰豈其然乎疑之也

謝曰公叔文子當時賢者恐於聖人之事有未足耳如公明賈之對非禮義充溢於中時措之宜者不能故夫子謂豈其然乎

楊曰公明賈之言其義則是疑非公叔文子所及也君子與人為善不正言其非故曰其然豈其然乎為疑辭以語之

侯曰公明賈之言恐有溢美故夫子曰其然豈其然乎

尹曰如公明賈之言則是成德之事也公叔文子未

必能至於此故曰豈其然乎未許之也

子曰臧武仲以防求爲後於魯雖曰不要君吾不信也
范曰要君者無上罪之大者也武仲之邑受之於君
得罪出奔則立後在君非己所得專也而據邑以請
見利而不顧義是以陷於大罪此由其好知不好學
也時人或以武仲存其先祀爲賢故夫子正之
謝曰以利害動之之謂要武仲迄奔齊則其居防以
請必有恃而敢然魯之立爲後蓋亦不得不然知則
知矣而非臣道

楊曰臧武仲如防卑辭以請後其迹非要君者而意
實要君焉故夫子言之亦春秋誅意之義也

侯曰人臣之事君也君命之而已求後於君非要而
何

尹曰武仲出奔邾自邾如防使來告曰苟守先祀無
廢二勳敢不辟邑於是魯立臧爲焉夫據邑而請立
非要君而何不知義者將以武仲之存先祀爲賢也
故夫子正之

子曰晉文公譎而不正齊桓公正而不譎

伊川解曰譎不正也詩序云主文而譎諫是也晉文
欲率諸侯以朝天子正也懼其不能故譎而行之召
王就之人獨見其名王之非而不見其欲朝之本心
是以譎而掩其正也齊桓本侵蔡遂至於楚而伐之
責其職貢其行非正也然其所執之事正故人但稱
其伐之正而不見其行事之本譎也是以正而掩其
譎也聖人發其心迹使晉文勤王之志顯且使後世
之慎所舉而不失其正也 又語錄曰此為作春秋
而言也晉文公實有勤王之心而不知召王之為不

順故譎掩其正齊桓公伐楚責包茅雖其心未必尊
王而其事則正故正掩其譎孔子言之以為戒正者
正行其事耳非大正也亦猶管仲之仁止以事功而
言也

范曰此為春秋而言也晉文公心正而行譎召王是
也故終之以譎齊桓公心譎而行正伐楚是也故終
之以正夫苟有善心必行正事行不正而曰我心善
未之聞也晉文公心非不善也而所行不正是以為
譎初雖不善其後能改者聖人貴之故周公稱祖甲

列於三宗齊桓公心非不譎也而所行復正是以為
正考桓文之事人君可不慎其所行也

謝曰張先生謂重耳婉而不直小白直而不婉
揚曰晉文公召王以諸侯見而春秋書曰天王狩于
河陽蓋不與其召也又書曰公朝于王所言諸侯自
朝于王蓋不與其以也文公有勤王之心而不知以
臣召君不可以訓故曰譎而不正齊桓公責楚以包
茅不入故其有夾輔王室之誠心而其事則正矣故
曰正而不譎然此特假之彼善於此而已非至正也

與管仲稱如其仁同義

尹曰臣師程頤曰晉文公欲率諸侯以朝王也懼其
不能而名王就見之人見其召王之罪而不明其欲
朝之本心是以譎而掩其正也齊桓公本怒蔡姬而
侵蔡懼其不義也因伐楚而責其職貢其用心本譎
而其所執者正是以正而掩其譎也聖人發其心迹
顯晉文勤王之志且使後世之君知所行之不正則
無以明其心當慎其所行也

子路曰桓公殺公子糾召忽死之管仲不死曰未仁乎

子曰桓公九合諸侯不以兵車管仲之力也如其仁如其仁子貢曰管仲非仁者與桓公殺公子糾不能死又相之子曰管仲相桓公霸諸侯一匡天下民到於今受其賜微管仲吾其被髮左衽矣豈若匹夫匹婦之為諒也自經於溝瀆而莫之知也

伊川解曰子路以不死為不仁故相對而言謂不死之不仁未如以九合之為仁也九合仁之功也謂管仲為仁人則可也仲之於子糾所謂可以死可以無死者也桓公兄也子糾弟也

薄昭與淮南厲王書云齊桓殺其弟以反國時

相去尚近仲私其所事輔之以爭國非義也桓公殺之雖過而糾之死實當仲始與之同謀遂與之同死可也知輔之以爭為不義將自免而期後功亦可也故聖人稱其功而曰豈若匹夫匹婦之為諒也自經於溝瀆而莫之知也匹夫匹婦執信知其死而已所謂莫之知也者不復能知權其重有可以無死之義也考之春秋桓公之入也書曰齊小白入于齊魯之納子糾也書曰公伐齊納糾左氏誤多子字後書齊人取子糾殺之言子者蓋非齊人已盟立之而又殺

之也齊人非以不正而舍之也直反覆而背之耳若桓弟而糾兄管仲所輔者正桓奪其國而殺之則管仲與桓公乃不可同世之讐也若計其後功而與其事桓聖人之言無乃害義之甚啟萬世反覆不忠之亂乎桓公子糾之正否子路子貢所知也故夫子答之但言無死為可耳後人能審其本末然後見義之所當也又語錄曰管仲不死觀其九合諸侯不以兵車乃知其仁也無此則貪生惜死雖匹夫匹婦之諒亦無矣又曰齊侯死諸公子皆出小白長而當

立子糾少亦欲立管仲奉子糾奔魯小白入齊既立仲納子糾以抗小白以少犯長又所不當立義已不順既而小白殺子糾管仲以所事言之則可死以義言之則未可死故春秋書齊小白入于齊以國繫者明當立也又書公伐齊納糾去子明不當立也至齊人取子糾殺之此復稱子者罪齊大夫既盟而殺之也或問桓公殺公子糾管仲不死而從之殺兄之人固可從乎曰桓公子糾襄公之二弟也桓公兄而子糾弟襄公死則桓公當立此以春秋知之也春秋

書桓公則曰齊小白言當有齊國也於子糾則止曰糾不言齊以不當有齊也不言子非君之嗣子也公穀并注四處皆書納糾左傳獨言子糾誤也然書齊人取子糾殺之者齊大夫嘗與魯盟于既既納糾以為君又殺之故書子是二罪也管仲始事糾不正也終從於正義也召忽不負所事亦義也如魏徵王珪不死建成之難而從太宗可謂害於義矣又曰仲尼謂管仲如其仁蓋言其有仁之功管仲其初事子糾所事非正春秋書公伐齊納糾而不稱子不當立者也不當立而事之失於初也及其敗也可以死可以無死與人同事而死之理也知始事之為非而改之義也召忽之死正也管仲之不死權其宜可以無死也故仲尼稱之曰如其仁謂其有仁之功也又曰孔子稱管仲如其仁但稱其有仁之功也使管仲事子糾正而不死後雖有大功聖人豈復稱之耶若以為聖人不觀其死不死之是非而止稱其後來之功則甚害義理也或問孔子未嘗許人以仁稱管仲以仁何也曰此聖人闡幽之道只為子路以子糾

死管仲不死為未仁此甚小却管仲故孔子言其有仁之功此聖人言語抑揚處要當自會得

范曰管仲不死子糾而相桓公子路子貢責之以義而夫子稱其仁九合諸侯一正天下此仁之大也彼死於子糾之義豈可以易此哉聖人之於人責其大而不可責其細取其多而不取其少故不責管仲之不死而責其不知禮死於子糾有不足為非管仲所難故不死不為苟生而相桓公不為利所以為仁也謝曰不死未足以見管仲之仁然不死非不仁也當

是時於子糾君臣之義未正知桓公可以有為也而愛其死以有待故與匹夫匹婦感慨自殺者異自其九合諸侯不以兵車民無左衽之患則仁可見矣

楊曰糾與小白未嘗為世子而俱出奔故春秋不書

子而書曰公伐齊納糾齊小白入於齊左氏曰納子糾公穀皆曰

納糾其義當以公穀為正以齊繫小白者明小白之宜有齊者也

糾不稱子又不繫之齊者外之不宜有齊者也不宜有齊而入之是為亂而已管仲相之又射桓公中鉤焉則濟惡以成其亂者也及其敗亡也又烏得而讐

桓公哉知其罪而請囚焉聽命於齊正也桓公既入
取子糾而殺之則已甚矣故卒書曰齊人取子糾殺
之書子所以惡齊也然管召之於糾既嘗相之委質
為臣矣以其分言之蓋可以死也然而爭非其義則
可以無死矣可以死可以無死故召忽死之為傷勇
管仲不死為徒義孔子所以稱其仁而與其不死也
方齊之未有君也諸公子在外先入者得之人臣各
為其主用烏敢貳哉其射桓公也非有私焉忠於其
主而已故管仲處之不自以為嫌而桓公遇之不得

以為罪義固然也使管仲之射桓公出於其私焉則
義之所必誅尚得而相之乎若召忽之死是亦志仁
而已故孔子不斥言其非謂其無惡故也仲素問
孔門弟子皆不許之以仁獨許管仲何也曰管仲九
合諸侯一匡天下子路等未必能為之然路徑自別
若使子路必不肖恁地做學之為王者事久矣詭遇
得禽雖若丘陵弗為也又問那裏見它詭遇處曰君
淫亦淫君奢亦奢皆是詭遇且賺得入手做將去不
問

尹曰子路以管仲不死子糾之難不仁故子曰不死
之不仁未若九合之仁也九合者仁之功也非以仲
為仁人也臣師程頤曰威公兄當立子糾弟也不當
爭管仲輔弟以爭國而威公殺之仲與之同死亦可
也知輔之爭為不義將自勉以期後功亦可也故孔
子稱其功而曰豈若匹夫匹婦之執信不復知權輕
重者哉春秋書威公之入也曰齊小白入于齊書魯
之納子糾也曰公伐齊納糾威公子糾之正否子路
子貢之所知故夫子之答獨言其可以不死焉使管
仲有後功何足道哉

子仲所輔者正而不死其難則可謂反覆不忠之士雖
公叔文子之臣大夫僎與文子同升諸公子聞之曰可
以為文矣
范曰臧文仲下展禽夫子以為不仁文子無心於貴
賤彼已而惟賢是與可謂仁矣文者仁之著見于外
者也

呂曰與家臣同升而無嫌上賢之至也物相雜故曰
文不專於貴貴而雜之以上賢此所以為文

謝曰無媚嫉上人之心故能舉賢才謂之文謚法有如此者
楊曰尚賢而有禮斯可為文矣

侯曰物相雜故曰文能進賢退不肖所以文之也故可以為文

尹曰臧文仲知展禽之賢而不舉之孔子謂之竊位公叔文子舉其家臣與之並列孔子許其文孟子曰不祥之實蔽賢者當之亦猶是也

子言衛靈公之無道也康子曰夫如是奚而不喪孔子曰仲叔圉治賓客祝鮀治宗廟王孫賈治軍旅夫如是奚其喪

范曰國有人則存無人則亡以靈公之無道也而有三人焉猶足以不亡况其有道任賢使能何可當也詩曰無競維人四方其訓之若得其人必無敵於天下矣

謝曰仲叔圉祝鮀王孫賈其德未必優而其才可使也靈公能用其所長雖未可以致治然事亦無廢滯矣

楊曰官得其職則紀綱法度猶存焉故雖無道而不
喪
侯曰官得其人則政事舉君雖無道紀綱存焉奚其
喪

尹曰衛靈公之無道宜喪也而能用此三人焉猶足
以保其國而况有道之君能用天下之賢才者乎詩
曰無競維人四方其訓之

子曰其言之不怍則為之也難

明道曰能言不怍者難

伊川曰所為言之不愧

范曰內有其實則言之不慚言之不慚則為之必難

矣君子之言行相顧言之必可行也行之必可言也

言有諸已則言無愧言不過實可履而行此所以為難

也

謝曰為不善者言之亦怍言之可怍而不怍則寡廉
鮮恥何所不至故難與為道

楊曰其言之不怍而行欲必揜焉則為之也難矣此
古者所以言不出也

尹曰能為者不敢輕言其言之不慚者未必能為之也

陳成子弑簡公孔子沐浴而朝告於哀公曰陳恆弑其君請討之公曰告夫三子孔子曰以吾從大夫之後不敢不告也君曰告夫三子者之三子告不可孔子曰以吾從大夫之後不敢不告也

明道曰陳恆弑君夫子請討當時夫子已去位矣又曰孔子請討當時得行便有舉義為周之義伊川曰孔子之時大倫亂矣君聽於臣父聽於子動

即弑君父是不可一朝居也必變而後可魯有三桓無以異齊何以孔子雖小官必仕於魯只是修周公之法齊既壞太公之法後來立法已是苟且及其末世并其法壞之亂甚於魯故其弑亦先於魯孔子之仕於魯欲以為兆得可為處便為如陳恆弑其君孔子請討之一事正則百事自己不得傳言以魯之眾伐齊之半此非孔子請討之計如是則孔子只待去較力借使言行則亦上有天子下有方伯須謀而後行又曰陳恆弑其君孔子沐浴而朝請討之左氏

載孔子之言謂陳恒弑其君民之不與者半以魯之衆加齊之半可克也恁地是聖人以力角勝都不問義理也孔子請伐齊以弑君之事討之當時哀公能從其請孔子必有處置須是顏回使周子路使晉天下大計可立而遂孔子臨老有此一件事好做奈何哀公不從其請可惜

范曰孔子老矣國有大事必告焉從大夫之後故也臣弑其君者天下皆得而誅之而齊強魯弱常困於齊故魯之君臣皆以為齊不可伐孔子所言者義也

得其義則強失其義則弱使魯能用孔子豈其強而已矣言而不行則明其義以示後世故告于君又告于二三子不可則止告在已而行之者在君與相也齊景公問政於孔子孔子對曰君君臣臣父父子子景公之時已無君臣父子矣故景公死十年陳氏三弑其君遂滅齊國豈一朝一夕之故哉

呂曰使魯從孔子而討陳恒則湯征葛伯之舉也何患天下之無助乎

謝曰當是時齊強魯弱陳成子弑簡公雖人心所不

甚與而魯之君臣不敢加兵畏非敵故也能順人心
行天討魯其憂不足以霸諸侯一天下乎師出有名
戰必克矣夫子沐浴而朝豈止盡吾職事也哉蓋欲
仗大義以下天意

楊曰孔子從大夫之後則與謀其國之政故隣有賊
義當討之不敢不告沐浴而後朝者國有大事敬之
也孟子曰天子討而不伐諸侯伐而不討魯諸侯也
而請討之蓋當是時周雖衰微天下猶以為君也征
伐宜自天子出使魯君從之則孔子其使於周而請

命乎以天子之命討之則周之威令將復行於天下
而王業之興其基於此矣魯之君臣皆莫之從也庸
非天乎

尹曰孔子雖去位以其嘗為大夫也故有大事義必
告焉臣師程頤曰左氏謂孔子欲以魯國之衆加齊
之半誠如此說是以力不以義也若孔子之志必將
正名其罪上告天子下告方伯請命於周率與國而
討之至於所以勝齊者孔子之餘事也豈計魯人之
衆寡哉當是時天下之亂極矣因是足以正之使孔

子得行其志則天下將知畏而有所不敢東周其復興乎魯之君臣終不從之可深惜哉

子路問事君子曰勿欺也而犯之

范曰古之事君者勿欺也而犯之後之事君勿犯也而欺之夫惟不欺是以有過必犯犯非子路所難也而不欺為難故夫子教以先勿欺而犯也

謝曰事君有犯而無隱

楊曰孔子嘗以由為行詐又以為佞故其問事君則告之以勿欺而犯之

侯曰事君以欺非臣道也犯之謂非誠不可也

尹曰古之事君者盡誠而不敢疑犯顏以納忠也然則不敢犯顏而面欺者得為忠乎

子曰君子上達小人下達

伊川曰君子為善只有上達小人為不善只有下達

橫渠曰上達反天理下達徇人欲者與

范曰君子喻於義小人喻於利道德仁義高明之事君子所達也勢利可鄙下賤之事小人所達也上達入於上智下達入於下愚君子愈上小人愈下學問

之道所以為上達也

呂曰君子日進乎高明小人日究乎汙下

謝曰大受小知之別也以孟子出晝與孔子去魯之

事攻衆人之論疑其相去遠矣蓋事盡然

楊曰君子小人之分善利而已孜孜為善則為舜非

上達歟孜孜為利至於為跖非下達歟

尹曰達者達盡事理之謂

子曰古之學者為己今之學者為人

伊川解曰為己欲得之於己也為人欲見知於人也

又語錄曰古之學者為己今之學者為人古之仕

者為人今之仕者為己古之強有力者將以行禮今

之強有力者將以為亂或問古之學者為己不知

初設心時是要為己是要為人曰須先為己方能及

人初學只是為己鄭宏中云學者先須要仁仁所以

愛人正是顛倒說却又曰古之學者為己其終至

於成物今之學者為人其終至於喪己

范曰古之學者正心誠意以為己也後之學者病人

不知所以為人也為己者履而行之為人者徒能言

之人君之學所以行堯之道非徒言而已
呂曰為己者自信而已遯世不見知而不悔為人者
人不用則不學人不知則不修

謝曰為己非不為人而專於愛己特非為人而學故
也若止於愛己則楊氏之為我耳

楊曰為己之學格物致知而已推之於天下國家乎
何有故舜在深山之中與木石居鹿豕遊若將終身
焉及其有天下若固有之為人之學反是
尹曰學者本於為己修己既至然後可以推而及人

也為人而學者非務本之學也

蘧伯玉使人於孔子孔子與之坐而問焉曰夫子何為
對曰夫子欲寡其過而未能也使乎使乎
范曰君子之患在於未能寡過能寡其過益莫大焉
為人使如此可以事君矣

謝曰蘧伯玉以行年六十而六十化稱必習矣而察
欲寡其過者也世蓋有欲言人之賢而未知所以言
者使者以此稱伯玉亦可謂知言矣故夫子與之
楊曰欲寡其過非克己能如是乎使者對之無溢辭

而伯玉之賢益彰故夫子善之

侯曰夫子常曰君子哉蘧伯玉邦有道則仕邦無道則可卷而懷之則其爲人也欲寡其過而未能可知矣使者以此言之則知言矣故孔子稱之

尹曰語謙卑而事美善稱其主者也子曰使乎使乎稱其專對之善也

子曰不在其位不謀其政曾子曰君子思不出其位范曰不在其位不謀其政亦夫子所常言也弟子各以所聞記之君子思不出其位此艮之象也物各止

其所而天下之理得矣故君子思不出其位而君臣上下大小皆得其職也

謝曰止其所也

楊曰思其出位而謀其政則失其分守而侵官亂政將無所不至矣

尹曰曾子之於孔子可見其志意之同也

子曰君子恥其言而過其行

謝曰行不掩言非直欺人亦以自欺是以可恥楊曰故君子欲訥於言而敏於行以此

侯曰言之不怍則為之也難君子所以恥其言之過其行也

尹曰君子貴實行而恥虛言也

子曰君子道者三我無能焉仁者不憂知者不惑勇者不懼子貢曰夫子自道也

伊川曰仁者不憂樂天者也

范曰聖人責己所以勉人也仁者樂天故不憂知者窮理故不惑勇者獨立故不懼中庸曰好學近乎知力行近乎仁知恥近乎勇知仁勇者入德之序也仁

知勇成德之序也

謝曰君子之道不出此三者所謂天下之達德故夫子不居

楊曰三者備蓋聖之事孔子所不居故曰我無能焉子貢曰夫子自道也蓋言其所自者道則仁知勇之名亦混矣

侯曰智仁勇三者唯聖能盡之故孔子不居

尹曰我無能焉自責以勉人也故子貢曰此乃夫子之事也成德者以仁為先故先之以仁者不憂若夫

進學者則以知為先夫子之言其序有不同
子貢方人子曰賜也賢乎哉夫我則不暇

伊川曰子貢常方人故孔子奮以不暇而又問曰女
與回也孰愈所以抑其方人

范曰人不可以利同故方人者賢人之所難而聖人
之所不為也夫我則不暇然則子貢為不可也
呂曰方人非不謂之學然有急於方人者故知所先
後則近道矣

謝曰聖人責人雍容辭不迫切而意已獨至方人非
智者不能謂之賢亦可但為己者非所先也故曰我
則不暇

楊曰孔子於三人行則得我師焉於方人乎奚暇

侯曰方人則近于作聰明矣非篤實為己者所先故
曰夫我則不暇

尹曰方人者比方人之優劣也固不可謂之惡然非
賢者所急也故曰夫我則不暇

子曰不患人之不已知患其不能也

范曰學者莫不患人之不已知而不強其所不能故

莫若反諸己而不願乎其外則充實而有光輝矣能為堯舜則有堯舜之譽何患人不知哉

謝曰求為可知也

楊曰患其不能則亦求為可知而已

侯曰君子修己而已人知不知非所患也

尹曰反求諸己不願乎外也

子曰不逆詐不億不信抑亦先覺者是賢乎

伊川曰人以料事為明便駸駸入逆詐億不信去也

范曰君子可欺以其方故不逆詐待人以誠故不億

不信見幾而作故先覺者是為賢乎君子雖不逆不億而邪正是非安危治亂未嘗不覩之於未然也先覺者知者之事逆詐而億不信者心之偽故君子不為也

呂曰不見其詐不逆謂人之詐不知其不信不億度人之不信也雖然君子豈容物之見欺燭乎事幾之先不容詐與不信加乎已

謝曰賢者於事能見之於微謂之先覺如履霜可以知堅冰也不知者遂妄欲逆詐億不信則過矣蓋未

知先覺之所為先覺也

楊曰君子一於誠而已惟至誠可以前知故不逆詐不億不信而常先覺也抑亦以此是賢乎若夫不逆不億而卒為小人所欺焉斯亦不足觀也已

侯曰孔注云先覺人情者是寧能為賢乎或時反怒人此理是

尹曰賢者之於事不逆詐以測之不億度而不信之也然而情偽幾微無所逃其明惟能先覺之是賢也微生畝謂孔子曰丘何為是栖栖者與無乃為佞乎孔

子曰非敢為佞也疾固也

橫渠曰栖栖依於君也固猶不回也

范曰夫子疾世之衰欲行其道而反之於堯舜三代此豈微生畝所得知哉

謝曰猶言吾豈匏瓜也哉

楊曰微生名孔子而語之子曰非敢為佞也卑辭以對則微生必鄉黨之有齒德者以栖栖為佞而不知

執一之為固其晨門荷蕢之徒歟故以疾固反之

尹曰栖栖猶皇皇也佞口給也固陋也孔子所以栖

栖者以疾世之固陋也微生畝之流皆與聖人異趨
不知聖人者也君子之所為衆人固不識矣

子曰驥不稱其力稱其德也

范曰驥雖有力而無其德則不可乘人雖有才而無
其德則不可用古人之用才而敗者取其力而不取
其德也力者所受於天德者所習於人學所以成德
也人而不學則其所受於天者不足以為德矣乘驥
而不以德必有奔車之敗况用無德之人乎

呂曰才受於天德繫乎學故君子尚學之功不以受

於天者為貴

謝曰有德然後可以語才無德而有才不免為小人
自古姦雄何嘗不以才稱惟其無德是以必為天下

禍

楊曰驥不以力稱况君子而可以不尚德乎

侯曰所謂君子者德也力奚與焉

尹曰驥雖有力其稱在德人有才而無德則亦奚足

尚哉

或曰以德報怨何如子曰何以報德以直報怨以德報

德

范曰聖人之道如權衡之於輕重無私於物物亦無怨焉以德報德者人之爲也以直報怨者天之理也謝曰以怨報德固刑戮之民然以德報怨亦不直矣君子於人無怨也故無以怨報怨之理惟不若世之要譽強仁苟以避怨惡之名者蓋其心不在怨惡誅之亦可所謂直也求不報之名而不誅者其不直乎楊曰以德報怨以怨報德皆私也一有私焉曲在其中矣公天下之善惡而不爲私焉夫是之謂直 又

曰以怨報怨以德報怨皆非直也所謂直者公天下之好惡而不爲私耳曰如是則以德報德何以辨之曰所謂德非姑息之謂也亦盡其道而不爲私耳若姑息則不能無私矣曰人有德於我不幸而適遇所當施之者非吾意之所欲能不少有委曲如庾公之斯之於子濯孺子不亦可乎曰然也侯曰以德報怨非所以報也以怨報怨非君子之心也君子以謂得失在彼我何與焉犯而不校可也以德報德以直報怨理之順也

尹曰君子之用心公而已或怨或德非有矯失盡其情而已

子曰莫我知也夫子貢曰何爲其莫知子也子曰不怨天不尤人下學而上達知我者其天乎

明道曰下學而上達意在言表也又曰自下而上達者唯造次必於是顛沛必於是又曰釋氏唯務上達無下學然則其上達處豈有是也元不相連屬但有間斷則非道也又曰聖賢千言萬語只是欲人將已放之心約之使反復入身來自能尋向上去

下學而上達也

伊川曰學者須守下學上達之語乃學之要下學人事便是上達天理或曰古之教人必先於洒埽應對進退何也曰下學而上達雖夫婦之愚可以與知者及其至也雖聖人有所不知也今夫居處恭執事敬雖衆人能之然彼聖賢之所以爲聖賢者亦豈外是哉然卒異於衆人者以衆人習不致察不能上達耳夫惟終身由之而不知其道故曰人莫不飲食也鮮能知味也又曰莫我知也夫夫子以此發子貢

也不怨天不尤人下學而上達知我者其天乎子貢
宜可與言也故以是發之 又曰王通曰知命者不
怨天自知者不尤人王通豈知所謂命者哉至如釋
氏有因緣報應之說要皆不知命者也 又曰不怨
天不尤人在理當如此

橫渠曰上達則樂天樂天則不怨下學而治己治己
則無尤 又曰責己者當知無天下國家皆非之理
故學至於不尤人學之至也 又曰困而不知變民
斯為下矣不待困而喻賢者之常也困之進人也為

德辨為感速孟子謂人有德慧術知常存乎疢疾以
此自古困於內無如舜困於外無如孔子以孔子之
聖而下學於困則其蒙難正志聖德日躋必有人所
不及知而天獨知之者矣故曰莫我知也夫知我者
其天乎

范曰不怨天者樂天也不尤人者知命也下學所以
窮理上達所以盡性窮理盡性則可以知天矣故知
我者惟天也

呂曰不怨天不尤人則道在我矣下學而上達則天

人一矣德至於是則其所獨知非聖人有所不與
謝曰天人物我上下本無二理不怨天則與天為一
無可怨不尤人則與人為一無可尤下學而上達則
上下一矣如此則雖人不我知我其自知矣我與天
為一謂之天知亦可 或問儒佛之辨曰吾儒下學
上達窮理之至自然見道與天為一故孔子曰知我
者其天乎以天為我也佛氏不從理來故不自信必
待人證明而後信 又曰學須先從理上學盡人之
理斯盡天之理學斯達矣下學而上達其意如此故

曰知我者其天乎

楊曰天德之公非以人欲之私所能知也故知我者
其天乎

尹曰天人事理本無二也下學人事而上達天命自
洒埽應對以至乎窮理盡性本無二道也下學而已
聖人何所怨尤乎而曰莫我知也夫所以發子貢之
問也

公伯寮愬子路於季孫子服景伯以告曰夫子固有惑
志於公伯寮吾力猶能肆諸市朝子曰道之將行也與

命也道之將廢也與命也公伯寮其如命何
范曰不知命無以為君子道之將廢有命則公伯寮
之愬不足恤也孟子曰臧氏之子焉能使予不遇哉
如此則不怨天不尤人也
謝曰雖公伯寮之愬行亦命也其實公伯寮無如之
何
揚曰子服景伯之言蓋尤人者故孔子畲以廢興之
命蓋聖人不怨天不尤人也如是
侯曰命天理也道之廢興順天可也公伯寮其如命

何

尹曰君子於利害之際安之以命而已矣

子曰賢者辟世其次辟地其次辟色其次辟言

明道曰辟世辟地辟色辟言非有優劣只說大小次

第

伊川曰賢者能遠照故能辟一世事其次辟地不居

亂邦

橫渠曰克己行法為賢樂己守法為聖聖與賢迹相
近而心之所至有差辟世者依乎中庸沒世不遇而

無嫌辟地者不懷居以害仁辟色者遠恥於將形辟
言者免害於禍辱此為士清濁淹速之殊也辟世辟
地雖聖人亦同然憂樂於中與賢者其次者為異故
曰迹雖近而心之所至者不同
謝曰聖人不必遯世遯世者特舉世不見知而已賢
者隱居則辟世也知一國之不可為不知一世之不
可為其次也不知君不可以有為禮貌衰然後去又
其次也至言而後去則亦晚矣其識有敏有不敏故
也然其流同出於辟世故不可與聖人去就同論聖

人有禮貌衰而去謂吾不能用而行者其道異此
尹曰臣師曰辟世辟地辟色辟言雖以大小次第言
之然非有優劣也所遇不同爾辟世者舉世不見知
則隱也辟地者不居亂邦也辟色辟言者遠恥於將
形也

子曰作者七人矣

伊川解曰七人後章所謂逸民者也仲尼曰雖有作
者虞帝不可及也作者蓋作於世者謂王者也此逸
民而謂之作者可乎蓋上承辟世辟地之言而云作

此道者七人矣大概言作此隱遯之趣者七人矣不
須分此四目也此四辟者言逸民有此四者耳
橫渠曰作者七人伏羲神農黃帝堯舜禹湯制法興
王者之道非有述於人者也

范曰伯夷叔齊辟世者也虞仲夷逸辟地者也柳下
惠少連辟色者也朱張辟言者也故曰作者七人矣
楊曰辟世者若伯夷待天下之清是也非遯世無悶
確乎其不可拔不足以與此辟地若陳文子有馬十
乘棄而違之是也故為次辟色謂禮貌衰則去之辟

言則僅免禍辱而已斯為下作者七人豈所謂逸者
是歟

尹曰臣師及張載皆謂伏羲神農黃帝堯舜禹湯制
法興王之道非有述於人者也

子路宿於石門晨門曰奚自子路曰自孔氏曰是知其
不可而為之者與

范曰知其不可而不為者晨門也知其不可而為之
者孔子也此所以異於逸民也夫不可在天而為
不為在己聖人畏天命故修其在己者以聽之天未

人之仁無絕物之道也末之難矣猶云終之難矣
謝曰古之賢者多隱於抱關如石門荷蕢雖不知孔
子其語亦有深意也特不知聖人樂天知命有憂之
大者其真辟世之士與子曰果哉末之難矣彼其果
於自信者吾言未易入也故無足詰難
楊曰聖人之時何容心哉當其可而已荷蕢以其有
心譏之而不疑蓋莫之知而易其言也故曰果哉末
之難矣晨門曰是知其不可而為之者與與疑辭也
則異乎荷蕢之果矣

尹曰晨門荷蕢皆隱者也其亦微生畝之流歟故孔
子曰果如爾所謂亦豈難哉聖人之時中蓋不為耳
子張曰書云高宗諒陰三年不言何謂也子曰何必高
宗古之人皆然君薨百官總已以聽於冢宰三年

范曰諒陰三年不言天子諸侯之禮皆然也高宗免
喪猶不言言而得傳說故見於書書之所記者事也
故孔子之所言者禮也

侯曰三年之喪自天子達於庶人一也人君當不言
之時百官總已以聽於冢宰自古已然君臣一體伊

尹之於殷周公之於周用是道也又何疑焉後世君
不君臣不臣故高宗之事雖學者亦以為疑
楊曰三年之喪天下之通喪也自天子達方其無事
而冢宰以統百官均四海為職則諒陰三年使百官
總已而聽焉何嫌之有

子曰上好禮則民易使也

范曰君者天下之表也君好之則民從之上行之則
下効之故上好禮則民易使其理然也
謝曰禮達而分定則易使

楊曰上好禮則民志定而知所以事上故易使
侯曰禮者所以辨上下定民志者也民志定則上下
之分正而易使也

尹曰君好之則民從之上行之則下効之皆在上之
化而已

子路問君子子曰修己以敬曰如斯而已乎曰修己以
安人曰如斯而已乎曰修己以安百姓修己以安百姓
堯舜其猶病諸

伊川曰修己以安百姓莫須有所施為乃能安人此

則自我所生學至堯舜則自有堯舜之事 又曰君子修己以安百姓篤恭而天下平唯上下一於恭敬則天地自位萬物自育氣無不和四靈何有不至體信達順之道聰明睿知皆由此出以此事天享帝故中庸言鬼神之神盛而終之以微之顯誠之不可揜如此夫 此一段前更有數語在顏淵篇仲弓章 橫渠曰可欲可願惟聖人之智不越盡其才以勉焉而已故君子之道四孔子自謂未能博施濟眾修己安百姓堯舜病諸是知人能有願有欲不能窮其願

欲修己以安人修己而不安人不行乎妻子况可愾於天下乎

范曰君子無不敬也敬身為大楊雄曰人必其自敬也然後人敬之人必其自愛也然後人愛之自愛仁之至也自敬禮之至也君子之道本諸身故修己以敬大器先自治則能治人先修己則能安人聖人之治天下猶天地之養萬物也無一物不得其養一民不得其所則難矣禹思天下有溺者由己溺之稷思天下有飢者由己飢之故博施濟眾修己以安百姓

堯舜以為病人君可不勉哉

呂曰修己不敬則道不立進之則安人人者以人對己進之則安百姓百姓者則盡乎人矣此堯舜猶病諸者也修己以安百姓所謂不言而信不怒而威者與

謝曰修己舍敬以直內則不能安人安百姓則擴而大之也使由也知求諸道則豈曰如斯而已乎故夫子謂堯舜之道不越如此

楊曰修己以直內為主推之至於家齊國治天下平

然後為至然天下不能無害民者雖堯舜其猶病諸故憂驩兜遷有苗畏巧言令色孔子

尹曰施於人者必本於己故君子以修己為本修己之要欽以直內推而及物至於百姓皆被其澤猶天地之養萬物無不得其所者其本皆在於身修故馴致可至於天下平曰堯舜猶以為病者蓋以子路每以為未足故也

原壤夷俟子曰幼而不孫弟長而無述焉老而不死是為賊以杖叩其脛

伊川曰或謂原壤之為人敢慢聖人及母死而歌疑似莊周非也乃鄉里麤鄙之人不識義理者耳觀夫子責之之辭幼不孫弟長而無述焉直至老而不死謂之賊便可見其為人也若是莊周夫子亦不敢叩責之適足啓其不遜爾彼亦必須有會
橫渠曰幼不率幼長無稱述老不安死三者皆賊生之道也

范曰故舊無大故則不棄也故雖夷俟猶不絕之聖人教人各因其才若原壤之無禮非可以言喻也故

深責而以杖叩之教誨之道不一端也

謝曰幼而不孫弟長而無述於世無補也亦賊夫天理而已故以杖數其罪而語之

楊曰禮人不畜蓋亦自反而已謂之賊而叩其脛不已甚乎若原壤蓋莊子所謂遊方之外者也故孔子切責之畏其亂俗也而彼皆受之而不辭非自索於形骸之內而不以毀譽經其心者能如是乎蓋惟原壤然後待之可以如此
尹曰幼而不遜弟長而無所述老而不死皆賊天理

者也若原壤之放曠非可以言諭也故叩其胫而深責之教諭之道非一端也觀原壤之母死而為孔子歌則其人可見矣

闕黨童子將命或問之曰益者與子曰吾見其居於位也見其與先生並行也非求益者也欲速成者也
范曰先王之教學不躐等幼者有為幼之事長者有為長之道童子而欲為成人是學未至而謂之至行未成而謂之成如拱把之桐梓不能養而亟用之於大豈不夭其天性哉

謝曰童子坐則在隅行則在後聽而弗問無與先生並行之理故曰非求益者

楊曰童子侍坐於先生居其位而與之並行是欲以成人自居豈求益者歟

侯曰童子而與先生並行則非求益者也

尹曰童子坐則隅行則左右聽而弗問今居位而並行幾於不孫弟者也何求益之有

國朝諸老先生論語精義卷第八上

衛靈公問陳於孔子孔子對曰俎豆之事則嘗聞之矣

軍旅之事未之學也

明日遂行言語不相投也

范曰靈公問陳則其志可知也

故對之明日遂行夫子豈不知靈公之無道而入其國如靈公猶足用為

善也况不為靈公者乎知其不可為而為之亦不為

苟去此聖人之行也

國朝諸老先生論語精義卷第八上

衛靈公第十五

衛靈公問陳於孔子孔子對曰俎豆之事則嘗聞之矣

軍旅之事未之學也明日遂行

明道曰明日遂行言語不相投也

范曰靈公問陳則其志可知也故對之明日遂行夫

子豈不知靈公之無道而入其國如靈公猶足用為

善也况不為靈公者乎知其不可為而為之亦不為

苟去此聖人之行也

謝曰善戰者不陳陳兵之末也若致天討無敵於天下蓋將有征而無戰何陳之有

楊曰秦不用周禮詩人知無以固其國則為國以禮軍旅非所問也俎豆器數而已禮之末也陳亦軍旅之末故問陳以是對曾子曰籩豆之事則有司存蓋儀章器數祝史之事有司之職也宜非君子所有事者然禮藏於器以為用而天下之至蹟存焉使靈公聞是而究其說則循而達之斯知所以為禮矣聞而莫之省則知其不足與有為也故明日遂行與孟子

對齊宣王問齊威晉文之事同意

尹曰衛靈公無道之君也復有志於戰伐之事故奮以未之學而去之

在陳絕糧從者病莫能興子路愠見曰君子亦有窮乎子曰君子固窮小人窮斯濫矣

伊川曰君子固窮固守其窮也

范曰君子身有窮而道不可窮故困而不失其所亨小人貧斯約富斯驕困則必屈其志窮則不安其命故窮斯濫矣

謝曰子路尊聖人惡夫上下之無交也是以愠見夫
子謂汝以修德而名達乎所以異於人者特固窮而
不若小人之斯濫也如此則窮達不在我矣何窮之
有

楊曰疑君子之不窮則無命無命則僥倖之心生故
窮則濫

侯曰子路之愠見不受命者也苟不受命窮斯濫矣
尹曰君子之窮也則守道而不變小人則無所不至
矣

子曰賜也女以予爲多學而識之者與對曰然非與曰
非也予一以貫之

范曰子貢之學病在於博而不能守約也故夫子問
以教之子貢以己觀夫子則誠以爲多學而識之矣
故曰然然其知足以知聖人多學而識之未足以盡
夫子之道必有其上者故又曰非與夫子知其可以
語上也故又曰非也予一以貫之曾子守約有受道
之質故夫子直告之曰吾道一以貫之至於子貢則
先攻其失而後語以至要也

謝曰仁者見之謂之仁知者見之謂之知人不能徧
觀而盡識宜其以為多學而識之也然孔子豈務博
者哉如天之於衆形匪物物而彫刻之也故曰吾道
一以貫之德輜如毛毛猶有倫上天之載無聲無臭
至矣
楊曰子貢蓋嘗博之以文矣至是欲約之故告之以
此然亦當其可也

侯曰聖人之學窮理盡性以至於命一貫而已何用
多學哉子貢初疑而終喻故夫子告之曰予一以貫

之

尹曰子貢之於學不及曾子也如此孔子語曾子一
以貫之蓋不待其問而告曾子復深喻之曰唯至於
子貢則不足以知之矣故先發其問曰女以予為多
學而識之者與果不能知之以為然也又復疑其不
然而請焉方告之曰予一以貫之雖聞其言而不能
如曾子之唯也

子曰由知德者鮮矣

范曰德者自得於內而不願乎人知也楊雄曰我知

爲之不我知亦爲之厥光大矣必我知而爲之光亦
小矣子路以君子有窮至於愠見是修身而必欲我
知也故曰知德者鮮矣所以責而進之也
謝曰人莫不飲食也鮮能知味也知德者鮮故也
楊曰人不知德則無以入德故貧則怨窮則濫言此
以救子路愠見之失

侯曰君子而知德猶飲食而知味也飲食而知味唯
易牙能之故曰由知德者鮮矣知德則知道矣
尹曰知德者鮮所謂終身由之而不知其道者衆也

子曰無爲而治者其舜也與夫何爲哉恭己正南面而
已矣

范曰聖人酬酢天下萬事之變其中心實無爲也舜
得禹咎繇稷契而相之如天運於上而寒暑各司其
序故恭己正南面而已矣

呂曰體信達順德孚於人從欲以治則四方風動與
人爲善則人效其能夫何爲哉君猶心也天下四體
也仁義禮智根於心其生色也睟然見於面盎於背
施於四體四體不言而喻其是之謂與

謝曰楊子曰襲堯之爵行堯之道法度彰禮樂垂拱而視天民之阜也無為也揚曰博五典庸五禮章五服用五刑皆天也舜何為哉恭已奉天而已

侯曰篤恭而天下平夫何為哉

尹曰聖人之治天下豈事事而為之哉恭已正南面而已矣其治天下之道畢矣

子張問行子曰言忠信行篤敬雖蠻貊之邦行矣言不忠信行不篤敬雖州里行乎哉立則見其參於前也在

輿則見其倚於衡也夫然後行子張書諸紳

伊川曰立則見其參於前也在輿則見其倚於衡也然後可以祈益又曰立則見其參於前所見者何

事更有一段在子張篇博學而篤志章

范曰言忠信行篤敬則不離於道道無往而不可故遠則蠻貊近則州里坐立登車莫不見之造次顛沛無須更離則所見無非道也子張之學外有餘而內不足故必敷陳以告之使之自外而入也謝曰言忠信言斯有物行篤敬行斯有常雖之夷狄

不可棄也故蠻貊之邦行矣言不忠信行不篤敬則同於無物與君蒿悽愴無異俵俵然無地可履故雖州里行乎哉立則見其參於前在輿則見其倚於衡此教以忠信篤敬之道也道也者忘之不可不忘不可惟正心誠意必有事焉而勿正心不下帶而道存者得之當職疑在前在衡時豈有物參倚也

楊曰見其參於前倚於衡必有事焉之意其者指物之辭所謂其者果何物也學者見此而後行則無入而不得矣

尹曰見其參於前倚於衡拳拳服膺之意子張於忠信篤敬有未盡焉書諸紳則欲事斯語也

子曰直哉史魚邦有道如矢邦無道如矢君子哉蘧伯玉邦有道則仕邦無道則可卷而懷之

范曰史魚一人之行也故曰直蘧伯玉衆可繼之行也故曰君子君子有賢之德業者也

謝曰蘧伯玉近於可以仕則仕可以止則止史魚愛君之意則多然明哲之所為不如是

楊曰史魚之直未盡君子之道焉故於蘧伯玉曰君

子哉蓋如蘧伯玉而後可免於亂世若史魚之如矢雖欲卷而懷之有不可得也

侯曰史魚之直知直而不知權者也知權則直在其

中矣蘧伯玉進退之間為君子則知行藏用舍矣

尹曰史魚之所處謂之直可也然未若蘧伯玉之為

君子

子曰可與言而不與之言失人不可與言而與之言失

言知者不失人亦不失言

范曰失人則在人者不得其所處矣失言則在己者

不得其所當矣皆非所以為知孟子曰知譬則巧也

夫欲不失人與不失言皆可勉而能也而况聖人知

周乎萬物而道濟天下豈有一人不得其所處一言

不得其所當者乎

謝曰可與言而不與言則後知何賴於先知不可與

之言則強聒而不受不知者則必有一於此矣

楊曰中人以上不與之語上則失人非成德也中人

以下與之語上則失言非達材也灼知人才之上下

非知者其孰能之

侯曰樊遲問知子曰知人知人則不失人亦不失言矣

尹曰知者之於人於言蓋兩不失之者也
子曰志士仁人無求生以害仁有殺身以成仁

伊川曰實理得之於心自別實見得是實見得非古
人有捐軀殞命者若不實見得烏能如此須是實見
得生不重於義生不安於死也故有殺身成仁者只
是成就一箇是而已 或曰有殺身以成仁無求生
以害仁竊謂所利者大一身何足惜也先生曰但看

生與仁孰重夫子曰朝聞道夕死可矣人莫重於生
至捨之以死道必大勝於生也曰既死矣敢問大勝
處如何曰聖人只睹一箇是

范曰志士者志於道仁人者主於仁身之所重者生
也苟有害仁則殺身以成仁况輕於生者其有違仁
以求之哉孟子曰生亦我所欲義亦我所欲也二者
不可得兼舍生而取義者也楊雄或問衆人曰富貴
生賢者曰義聖人曰神唯賢者能權輕重而取舍之
仁人者聖人之次也

呂曰不私至德以私至德

謝曰仁人之死生無擇也志士於死生取義也方其
舍生取義外物亦不足以間之故所成者仁曰當貴
楊曰孟子曰士尚志非仁無守也非義無行也夫是
之謂志士雖其心未能不違仁其欲成仁則與仁人
一也

侯曰志士志於仁者也故無求生以害仁有殺身以
成仁義之當為計較一生則害仁矣故曰仁人求生
害仁殺身成仁皆義也非仁也仁義本無二學者當

於一道上列出

尹曰志士仁人雖於死生利害之際唯知有仁而已
故殺身以成其德

子貢問為仁子曰工欲善其事必先利其器居是邦也
事其大夫之賢者友其士之仁者

伊川曰子貢問為仁孔子告以為仁之資非極力言
仁也

范曰事大夫之賢者友士之仁者推而至於天下之
善無所不取其仁豈不大哉顏淵問仁子曰為仁由

己子貢問為仁則告以事大夫友士是由人也由己者自誠而明者也由人者自明而誠者也自明而誠者聖人兼之故舜自耕稼陶漁以至為帝無非取於人者舜之為聖亦必由此猶工欲善其事無不先利其器也

呂曰仁者兼容遍體不與物共則不達事賢友仁達仁之先務與

謝曰大夫在所尊而况賢者士在所禮而况仁者事之友之則必有敬心存焉如之何仁不自此生也魯

無君子者斯焉取斯謂其有所事有所友故也介甫曰事衰世之大夫友薄俗之士聽淫樂視慝禮皦然不惑於先王之道難矣哉

楊曰事其大夫之賢者友其士之仁者輔仁之器孰利於此

尹曰欲為仁者當先擇仁賢而從之猶工之先利器也

顏淵問為邦子曰行夏之時乘殷之輅服周之冕樂則韶舞放鄭聲遠佞人鄭聲淫佞人殆

伊川曰三王之法各是一王之法故三代損益隨時之宜若孔子所立之法乃通百世不易之法孔子於他處亦不見獨於告顏子云行夏之時乘殷之輅服周之冕樂則韶舞此是於四代中舉這一箇法式其詳細雖不可見而孔子但示其大法使後人就上修之二千年來亦無人識者 又曰舉前代之善者準此以損益之此成法也鄭聲使人淫溺佞人使人危殆故放遠之然後能守成法 又曰行夏之時得其正也乘殷之輅質也服周之冕文也樂則韶舞盡善

盡美也問政多矣唯顏淵然後告之以此蓋三代之制皆因時損益其久也不能無弊周衰聖人不作故孔子斟酌先王之禮立萬世常行之道發此乃為之兆爾由是求之則餘皆可考也中庸言三重蓋發明此意 又曰行夏之時乘殷之輅服周之冕樂則韶舞與從周之文不悖從先進則為時之敝言之彼各有當也

橫渠曰顏回為邦禮樂制度不必教之惟損益三代蓋所以告之也法立而能守則德可久業可大鄭聲

佞人能使為邦者喪其所守故放遠之
范曰夫子之得邦家其舉而措之者蓋將如此此堯
舜三王之治天下致太平之事也顏子之才足以任
此故以告之自閔子以下不及也堯畏巧言令色舜
難壬人聖讒說殄行故命九官終之以龍作納言然
則顏子為邦何可以不放鄭聲不遠佞人也
謝曰為天下以禮樂為本當因襲帝王之迹而損益
之放鄭聲如大司樂禁淫聲慢聲遠佞人如遷驩兜
放有苗蓋亂德淫志不可以作心膂和民情非使顏

子致戒於斯

楊曰三代之相因有所損益而已後之繼周者雖百
世可知也故告顏淵以是蓋舉其端使知所損益而
已亦從周之意也

尹曰行夏之時乘殷之輅服周之冕樂則韶舞此可
謂百王不易之大法孔子之作春秋蓋此意也孔顏
雖不得行之於時然其為治之道可得而見矣

子曰人無遠慮必有近憂

伊川曰思慮當在事外

范曰書曰制治於未亂保邦於未危亂必生於治危必生於安易曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也
謝曰莫大之禍亦非一朝一夕之故慮遠者可以無近憂古人有見幾於罷醴者似近之矣

楊曰邦分崩離析而莫之慮則季孫之憂其在蕭牆之內必矣

子曰已矣乎吾未見好德如好色者也

范曰好德如好色好義如好利好賢如好佞則可謂能自克矣若此者夫子歎其終不得見也

楊曰世之好德無誠心則孔子知其已矣

子曰臧文仲其竊位者與知柳下惠之賢而不與立也

范曰臧文仲為政於魯若不知賢是不明也知而不舉是蔽賢也不明之罪小蔽賢之罪大故孔子以為不仁又以為竊位孟子曰不祥之實蔽賢者當之

謝曰所以蔽賢者無他知保祿而欲以擅之也是以謂之竊位

楊曰任國事以旁招俊又為職不任其職非竊位而何

侯曰事君以人而蔽賢不得居位之道竊據之也

子曰躬自厚而薄責於人則遠怨矣

范曰孟子曰君子有終身之憂舜人也我亦人也舜為法於天下可傳於後世我猶未免為鄉人焉是則可憂也憂之如何如舜而已矣顏淵曰舜何人也予何人也有為者亦若是孔子曰君子以義度人則難為人以人望人則賢者可知矣此責於人者薄也成

湯與人不求備檢身若不及商頌曰湯降不齊聖敬

日躋昭假遲遲此人君躬自厚薄責於人也

謝曰惟反己者知無責人之理至於躬自薄則厚責

於人也必矣然則不能遠怨者蓋亦未知自愛故也

楊曰躬不自厚而責人無已其取怨也孰近焉

侯曰不能責躬而責人無已知其取怨也

尹曰小人反是所以多怨

子曰不曰如之何如之何者吾末如之何也已矣

范曰易曰君子以思患而豫防之老子曰為之於未

有治之於未亂有國家者當防微杜漸若禍難已成
子雖聖人亦末如之何也

謝曰不畱情於無所奈何惟心無滯吝者能之此其
意已極高明

楊曰不於可為之時為之則後雖欲圖之亦末如之
何也已

侯曰天下之事當防微杜漸於未然之前故不曰如
之何若至於已然橫流極熾無可奈何之後雖聖人
亦無如之何矣故曰如之何者吾末如之何也已矣

尹曰事至於無如之何雖聖人亦無如之何矣故君
子思患而豫防之蓋謂此也

子曰羣居終日言不及義好行小慧難矣哉

范曰朋友講習為日不足羣居言不及義則不可與
入德行小慧以為知則不足與知道亦難以為君子
矣

謝曰言不及義則必放僻邪侈好行小慧則不可以
為大知其為小人也必矣小慧與知雖相似其實不

同

楊曰羣居言不及義而欲以察慧為明非居易之道也
侯曰羣居終日言不及義則為惡而已又以小慧矜人則不及於禍亂者難矣小慧非知也察慧而已
尹曰君子義以為質羣居而言不及之反以才知為能難矣哉

子曰君子義以為質禮以行之孫以出之信以成之君子哉

明道曰此四句只是一事以義為本又曰敬以直

內則義以方外義以為質則禮以行之孫以出之信以成之孫順也不止於言

伊川曰君子義以為體全於義也禮以行之孫以出之孫不必言也

范曰義以方外也故君子集義以義為體則莫不有法度文之以禮故非禮不行言出於已悖而出者亦悖而入孫而出者亦孫而入故出之必以孫行之必以信居之以義行之以禮出之以孫成之以信則可以為君子矣人君之道亦然民之所聽於君者以其

有義也故當以義為體治人莫急於禮人君孫以出之則天下亦歸之國無信不立有此四者可以為國矣

謝曰日可見之行皆義以方外之事故如質幹然禮行此孫出此信成此

楊曰君子所主者義而已義有分宜儀章品物為之容節所以行之也行而不以孫出之則禮不和孫而不以信成之則其為容節也浮文而已無著誠去偽之道亦不可行也四者具則文質彬彬故曰君子哉

尹曰義本也而以禮行之以孫出之以信成之斯可謂君子矣

子曰君子病無能焉不病人之不已知也

范曰人之病在於不修己而好求人知故每言此以誨人也

子曰君子疾沒世而名不稱焉

明道曰君子惟患無善之可稱當汲汲為善非求名也有實則有名名實一也若夫好名則徇名為虛矣如君子疾沒世而名不稱謂無善可稱耳非徇名也

范曰君子學以為己不求人知然沒世而名不稱則無為善之實矣楊雄曰名譽以崇之詩曰鼓鐘于宮聲聞于外名者實之賓也

呂曰論為善之效則疾沒世而名不稱語信道之至則遯世不見知而不悔

謝曰病人之不已知者則務外務外者兩失之不病人之不已知則務實務實者兩得之有實必有名沒世而名不稱無實故也先王之世鄉黨閭里為善者多無行修而譽不聞者是以名不稱為可疾後世禮

義衰微始有潛德韜光四十年人無識者

尹曰名謂無善之可稱非求名譽者也

子曰君子求諸己小人求諸人

范曰君子忠人故求諸己小人欺己故求諸人求諸己者自修也求諸人者自棄也故君子之過日損小人之過日益

謝曰君子無不反求諸己者小人反是此君子小人之所以分也

楊曰君子雖不病人之不已知然亦疾沒世而名不

稱也雖疾沒世而名不稱而所求者亦反諸己而已
小人求諸人故違道干譽無所不至三者文不相蒙
而義實相足此亦記言者之意
尹曰君子無不求諸己小人反是

子曰君子矜而不爭羣而不黨
伊川曰此矜尚之矜也 又曰君子以矜莊自持不
與人爭

范曰矜以自厲故與人不爭羣而無隨故好惡無黨
小人矜必至於爭羣必至於黨

謝曰自矜則與人有別異之道然不期於爭羣居則
與人有和樂之理然不期於黨

楊曰矜而不為崖異故不爭羣而以和故不黨
或問君子矜而不爭書曰汝惟不矜天下莫與汝爭能
君子可矜乎曰矜者矜莊之矜非謂伐也古人用字
各有所當難以一說該也

尹曰小人矜持則必至於爭相與則必至於黨
子曰君子不以言舉人不以人廢言

范曰能言之者未必能行聽其言者必觀其行故不

可以言舉人狂夫之言聖人擇焉陽虎之言孟子取之故不可以人廢言也

謝曰有言者不必有德

楊曰聽言必觀其行故不以言而舉言在可底績而已故不以人而廢

侯曰有言者不必有德故不以言舉人言或中理不可以非人而廢言故不以人廢言陽貨曰為仁不富矣此言豈可廢也

尹曰若孔子於宰予孟子於陽貨者是也

子貢問曰有一言而可以終身行之者乎子曰其恕乎己所不欲勿施於人

程范曰中庸曰忠恕違道不遠施諸己而不願亦勿施

於人孟子曰強恕而行求仁莫近焉恕者以己之身為人之身以己之心為人之心己欲安故安人已欲利故利人三王之治天下惟恕而已矣謝曰言恕則忠在其間無忠何所恕也推其道可以極於無我終身行之可也楊曰君子之學求仁而已舍恕其孰可終身行之乎

侯曰己所不欲勿施於人恕也恕忠之用也忠且恕也雖聖人亦不越如是而已豈不可終身行之乎

尹曰學貴乎知要子貢之問可謂知要矣孔子告之求仁之方也推而極之雖聖人無我不出乎此也終身行之不亦宜乎

子曰吾之於人也誰毀誰譽如有所譽者其有所試矣斯民也三代之所以直道而行也

明道曰直道行毀譽公也

范曰彼善而我譽之彼惡而我毀之毀譽生乎人非

生於我之私也故吾心未嘗有毀譽如有所譽必有所試如有所毀必有所見矣彼賢而我賞之彼罪而我罰之此三王之治民所以直道而行故天之於人作善降之福作不善降之禍善不善在人而禍福降之天無私焉有心毀譽則非直道也
謝曰聖人本無毀譽心而物未嘗自毀譽也因物可毀可譽而毀譽之是非之心也此之謂直道三代之時民有士君子之行以此
游曰大公至正之道古今所共由也合乎此則為是

外乎此則為非其所謂是者非惟聖人之所是天下亦以為是而好之其所謂非者非惟聖人之所非天下亦以為非而惡之聖人因民心之是非好惡還以治之非故矯揉其性而為不可順從之事也三代之君所以治者如此孔子亦出乎大公至正之道而已楊曰有所譽必有試焉則雖違道以干之不可得也三代之民得以直道而行者以此侯曰三代之所以直道而行者毀譽不私而已尹曰孔子之於人豈有意於毀譽之哉其所以譽之

者蓋試而知其美故也斯民也三代所以直道而行豈容私於其間哉

子曰吾猶及史之闕文也有馬者借人乘之今亡矣夫明道曰言吾力猶能補史之闕文當史之職而能闕疑以待後人是猶有馬者借人乘之也橫渠曰魯禮文闕失不以仲尼正之如有馬不借人以乘習不曰禮文而曰史之闕文者祝史所任儀章器數而已舉近者而言約也范曰史之闕文夫子所以聞見足以及之然而必闕

者示信也譬如馬可與人共則借人乘之不必專
之也故闕疑所以與天下共使人皆得通之不必以
身質之也今亡矣夫歎學者不然也
謝曰信以傳信疑以傳疑
楊曰事無徵則史闕文有馬者借人乘之孔子猶及
見也今亡矣夫蓋悼時之益偷也
尹曰古之良史有疑則闕之以待能者如有馬不能
調良則借人乘習之也孔子謂吾猶及見之今則無
矣

子曰巧言亂德小不忍則亂大謀

范曰德者本也言者末也故華言無實則亂德小仁
者大仁之賊也故小不忍則亂大謀君子所以貴果
斷也

謝曰巧言則心馳於外故亂德小不忍婦人女子之
愛也是豈足以成大謀

楊曰巧言必能成理故可以亂德小不忍則義不勇
故亂大謀

侯曰巧言似是而非所以亂德小不忍則無含弘之

度所以亂大謀
尹曰慎言則可以成德忍性則可以成事

子曰衆惡之必察焉衆好之必察焉
范曰衆惡之必察焉者爲其近於獨立也衆好之必察焉者爲其近於鄉原也
謝曰其不善者好惡之則是非特未定

楊曰惟仁者能好惡人衆好惡而不察焉則或蔽於私矣

侯曰衆人之好惡固已知其多當也然而如陳仲子

之廉匡章之不孝君子亦當察也

尹曰孟子之於於陵仲子章子是也

子曰人能弘道非道弘人

橫渠曰心能盡性人能弘道也性不知檢其心非道弘人也

范曰易曰神而明之存乎其人有大入則有大道有小人則有小道道本無體廣狹在人非由道也

謝曰人能徇道道不遠人人不求道道豈求人哉

楊曰推而行之放乎四海而準人弘之也不爲堯存

不為桀亡道固自爾非弘人也

子曰過而不改是謂過矣

范曰舜戒羣臣不曰無過而曰予違汝弼仲虺稱湯不曰無過而曰改過不吝聖人猶不敢自謂無過而况其下者乎惟過而不改則是為過若其能改則不為過也

謝曰改非過也所謂如日月之食焉

楊曰過而改之則復於無過矣何過之有

侯曰改過不吝所以稱湯也

尹曰君子不曰無過而以改過為美也成湯之聖改過不吝况其下乎

子曰吾嘗終日不食終夜不寢以思無益不如學也

范曰聖人求道其勤如此而况其下者乎思而不學則殆故廢寢食以思無益不如學之益也

謝曰非特以為無益也止於思則殆故濟以學

楊曰學而不思則罔思而不學則殆則學固不可以不思也然而未嘗學也而徒思焉譬之耕也未嘗種藝而惟耘耔之務則其無益也明矣

尹曰廢寢食以思不如學之益也故曰思而不學則殆
子曰君子謀道不謀食耕也餒在其中矣學也祿在其
中矣君子憂道不憂貧

范曰耕所以為食也而餒存焉未必得食學所以謀
道也而祿存焉未必得祿農夫不為有餒而不耕君
子不為不得祿而不學故謀道不謀食憂道不憂貧
治其本不恤其末也

呂曰使人易憂貧以憂道則何所不至

謝曰貧賤困辱其來既不可却而有道者能處能處
則何貧之有是以能知重輕緩急者止於憂道

楊曰耕也而有豐凶之不常則餒在其中矣修其天
爵而人爵從之則祿在其中矣為大人之事則何謀
食憂貧之有

侯曰君子志於道食非所謀也志於食則害道矣猶
耕也本為謀食非求餒也而餒在其中矣學本進道
非求祿也而祿在其中學者唯道之不進為憂貧非
所憂也孟子曰修其天爵而人爵從之祿在其中矣

尹曰耕所以為食也而餒存焉學所以為道也而祿存焉故謀道不謀食憂道不憂貧蓋所以治其本而不恤其末曾何以在外者而為憂樂哉
子曰知及之仁不能守之雖得之必失之知及之仁能守之不莊以涖之則民不敬知及之仁能守之莊以涖之動之不以禮未善也

明道曰知及之仁能守之莊以涖之動之以禮言為學始末當如此為政始末亦然
伊川曰知及之仁不能守之此言中人以下也若夫

真知未有不能行者 又曰知及之仁不能守之無得也仁能守之有諸己也莊以涖之行己也動之以禮在彼而應也有始有卒者先後之序也 周子先問此語是告學者亦是入道之序故知及之者見得到也仁能守之者孳孳於此也莊以涖之者外設藩垣以遠暴慢也動之以禮觀時應用皆欲中節也或者謂此事君如何先生曰臨政處己莫不皆然所謂仁能守之者孳孳於此也此言未能體仁且宜致思仁則安矣所以云守也

范曰知周於物故能及之仁有諸己故能守之莊所以自敬也禮所以自立也士之於學人君之於治必由此四者所以能久而成也
呂曰德不據則雖得必失德輕則民不敬文則不足則未善
謝曰此非知仁之盡也若知之盡豈有不能守之之理若仁之盡豈有不能莊不以禮者莊以涖之動之以禮亦所以養仁然苟有所守其於禮雖不中不遠矣故止曰未善也

楊曰知及之仁不能守之則人欲或勝之雖得必失矣仁能守之足以長人矣然而不莊以涖之則無方以外而民不敬色莊而已動之不以禮則民將貌事之而心不服故動之以禮然後為善
尹曰士之於學人君之於治當盡此四者至於動之必以禮而後成也

子曰君子不可小知而可大受也小人不可大受而可小知也
明道曰君子道宏故可大受而不可小了知此則孟

子所以四十不動心小人反是
伊川曰不可以小知君子而可以當大事也

范曰知其大則為君子知其小則為小人居仁由義
大也利於一己小也君子之道大故人不可以小知
抱關擊柝不以為少祿之以天下不以為多故可大
受小人則反是故治國必用君子不可用小人夫子
於君子小人每分別言之欲人君以此辨之也
呂曰君子不可以小事取知可以大事自受也故不
以能自名而自任以天下之重小人反是

謝曰大受所得者大如受道之受大受則決不可以
小知小知則決不可以大受蓋昔之善相馬者猶得
其精而遺其粗物色牝牡或不察也亦何疑於學者
楊曰君子養其大體而已不可小知而可大受小人
反是

侯曰君子不器故可大受大受受道也君子之所為
眾人固不識也可小知哉小人器識卑下反此者也
尹曰君子務其大故不可以小知小人局於小故不

不可以大受

子曰民之於仁也甚於水火水火吾見蹈而死者矣未見蹈仁而死者也

明道曰民之於仁也甚於水火言不肖為仁如蹈水火

伊川曰民於為仁甚於畏水火水火猶有蹈而死者言民之不為仁也趙景平問未見蹈仁而死者何謂蹈仁而死曰赴水火而死者有矣殺身成仁者未之有也

范曰水火所以養人亦所以害人仁道甚易而不傷

人民有蹈水火而死者而民畏仁莫有為也孟子曰惻隱之心人皆有之又曰人之所以異於禽獸者幾希庶民去之君子存之存之則入於聖人去之則近於禽獸君子不以仁為難故無終食之間違仁凡民之情以仁為難故畏之甚於水火夫子言此所以教民為仁也

謝曰仁者非不死特非蹈仁而致死也是以異於水火水火能養人亦能殺人而仁未嘗殺人此所以甚於水火

楊曰水火民賴以生民之於仁也其欲有甚於生者則仁固有甚於水火矣冒利而蹈水火而死者有之未見蹈仁而死者則世之人喻利而不知害故也侯曰人非水火不生活是人於水火不可一日無也然赴水火而焚溺也是水火有殺人之理也故子曰水火吾見蹈而死者矣至於仁則未見蹈而死者也子曰志士仁人無求生以害仁有殺身以成仁若如此仁亦可以人蹈而死也曰死於仁是義也非仁殺之也仁無殺人之理故也人為仁而死之耳豈有盡

人道而殺人者乎仁與義學者宜究其體用而默識之孔子只言仁而孟子言仁必言義義所以成仁也集義而生浩然之氣仁也

尹曰愚民之憚於為仁也甚於水火故孔子之言深切如此

子曰當仁不讓於師

明道曰為仁在己無所與讓也 又曰善名在外則可讓矣

范曰仁道在己則克己復禮惟之於人則博施濟眾

惟力行而已雖師長無所讓為仁由己非由人也
呂曰人之患在好為人師當其成物則不可以不教
人故不以師道自讓

謝曰為仁由己師何與焉人為之己亦為之非不讓
也如聞斯行之者

楊曰講學宜有讓於師至於天下歸仁則雖欲讓將
安所讓乎

侯曰為仁由己克己復禮為仁雖欲讓於師得乎

尹曰師長猶無所遜况它人乎聖人勉人為仁由己

者也

子曰君子貞而不諒

明道曰諒與信異貞大體是信諒必為也

伊川曰諒固執也與亮同古字通用孟子曰君子不

亮烏乎執

范曰孔子之教人未嘗不以兵食可去信不可去不
能正固而守信亦未足以為君子也君子之道不失
其正則信在其中矣孟子曰大人者言不必信行不
必果惟義所在直躬證父尾生守死非不信也其可

以為正乎
謝曰諒有硜硜之意貞而不諒豈以正行者也哉不
楊曰君子正而已不諒而為固或問君子可不諒
乎曰惟貞故可不諒所謂貞者惟義所在也
侯曰貞非固也而有固之象焉君子堅貞而義以行
之故曰君子貞而不諒諒信之固而小者也子曰豈
若匹夫匹婦之為諒也

尹曰正則諒矣諒則未必正也尾生者非不諒也其
可以為正乎

子曰事君敬其事而後其食

范曰君子之仕以行其義非謀食也有官守者修其
職有言責者盡其忠則受祿而不愧矣先事後得先
勞後祿事君之義也

謝曰人浮於食食其焉往

楊曰庶官所以代天工也代天其可不敬乎不敬其
事而先食則是矯誣以徇利耳其得罪也將安所禱
乎

侯曰事君者以行道為志非為祿也然亦有時而為

貧若專以食為事則廝役之志也不敬孰甚焉故曰
事君敬其事而後其食者此也

尹曰君子之仕也所以行其義故欽其事而後食非
為舖啜也又曰君子之仕祿食在所後事則始終
皆當敬故不以先後言

子曰有教無類

范曰凡人之性惟在所教善惡無類也教之以善則
為善類教之以惡則為惡類詩曰螟蛉之子果羸負
之人君之治民學者之教人一也善治民者後世之

民可使為堯舜之民善教人者中才之人可使有聖
賢之行也

謝曰善不善何常蹈之則為君子捨之則為小人豈
有類哉

侯曰修道之謂教豈有類哉有類則非修道也偽也
楊曰苟以是心至雖互鄉童子見不以難與言而不
與進

尹曰人性無不善也教之以善則成善類教之以惡
則為惡類也

子曰道不同不相為謀

橫渠曰有受教之心雖蠻貊可教為道既異雖黨類難相為謀

范曰道同則心同心同乃可相為謀學聖人之道者不可與學異端者同謀行忠信者不可與為欺偽者同謀所趣不同故也

謝曰不同術也

楊曰若伯夷伊尹之去就難相為謀矣 或問曰道不同不相為謀道一而已不同者何說曰天下殊塗

而同歸故道有不同者塗雖殊其歸則同道不同其趣則一也若伯夷伊尹去就則難相為謀矣

侯曰伯夷之清下惠之和不可相為謀

某尹曰道不同則心不同心不同則所趨異所趨異則

豈可與謀哉

子曰辭達而已矣

橫渠曰辭取意達則止多或反害也

范曰天下有道則行有枝葉天下無道則辭有枝葉君子之行務於敦實辭足以達意而已辨給華藻文

過其實者妄人也

謝曰不辭費也

楊曰辭尚體要貴達而已不以文為尚

尹曰辭所以達意而已矣

師冕見及階子曰階也及席子曰席也皆坐子告之曰
某在斯某在斯師冕出子張問曰與師言之道與子曰
然固相師之道也

范曰聖人之於人無所不盡其誠見瞽必有敬焉事
事而相之所以教人不侮鰥寡不虐無告也推之天

下則無一物不得其所故弟子詳記之以為後世法
也

謝曰觀聖人誠意如此必無欺暗室之理

楊曰聖人之於人無非道者曰某在斯某在斯之類
使其知之是乃相師之道也

侯曰瞽者有所不知不見故及階及席皆告之而又
曰某在斯某在斯蓋相其所不知不見而不使師至
有過之地也聖人御物之道其仁如此

尹曰聖人處己為人其心一致無不盡誠故也有志

於學者求聖人之心於斯可見矣

在國入於

曰其

子曰

與其

子曰

子曰

少

國朝諸老先生論語精義卷第八上 終

終

